

四庫全書

史部

欽定四庫全書

史部

浙江通志卷一百九十七至九十九

詳校官給事中臣戴璐

檢討臣德生覆勘

總校官編修臣倉聖脉

校對官中書臣李 奎

謄錄監生臣任楫文

欽定四庫全書

浙江通志卷一百九十七

方技

下

紹興府

周

歐冶子

越絕書楚王治風胡子曰寡人聞吳有干將越有歐冶子此五子甲世而生寡人願齋邦

之重寶皆以奉子因吳王請此二人作鐵劍可乎風胡子曰善於吳王令風胡子之吳見歐冶子干

將使二人作鐵劍歐冶子干將鑿茨山洩其溪取鐵英作為鐵劍三枚一曰龍淵二曰泰阿三曰工

布畢成風胡子奏之楚王楚王見此三劍之精神大悅

秦伊

越絕書民西大冢者句踐客秦伊善炤龜者冢也因名冢為秦伊山

漢

謝夷吾

後漢書方術傳字亮卿會稽山陰人少為郎史學風角占候太守第五倫擢為督郵時烏

程長有賊蒙倫使收索其罪夷吾到縣無所驗但望閣伏哭而還一縣驚怪不知所為及還白倫曰竊以占候知長當死近三十日達不過六十日遊魂假息非刑所知故不收之倫聽其言至月餘果有驛馬齋長印綬言恭卒倫以此益禮信之舉孝廉為壽張令稍遷荊州刺史鉅鹿太守所在愛育人物有善績左轉下邳令豫尅死日如期果卒

韓說

後漢書方術傳字叔儒會稽山陰人博通五經尤善圖緯之學舉孝廉與議郎蔡邕友善數陳

災青稍遷侍中光祐元年十月言於靈帝云其晦日必食乞自宮嚴裝帝從之果如所言中平二年

二月又上封事剋期宮中有災至日南宮大火遷江夏太守

### 三國吳

吳範

三國吳志字文則會稽上虞人以治歷數知風氣聞於郡中孫權起東南範委身服事每有災

祥輒推數言狀其術多效權欲討黃祖範曰今茲少利不如明年明年戊子劉表亦死征祖祖必生禽又言歲在甲子劉備當得益州後劉備盛兵西陵範曰後當和親皆如其言

### 晉

嚴卿

晉書藝術傳會稽人善卜筮卿人魏序欲暫東行時荒年多盜令卿筮之卿曰君當行必遭暴

害之氣而非劫也宜環之可索西郭外白雄狗繫着船前求索只得駁狗卿曰駁者亦足然猶恨其色不純當餘小毒及六畜革耳序行半路狗忽作聲甚急比視已死其夕序墜上白鷺數頭無故自死而序家無恙

南北朝

夏赤松

南史蕭惠基傳當時能巷人瑯琊王抗第一品吳郡褚思莊會稽夏赤松第二品赤松思

速善於大行思莊戲遜巧於闕巷

錢祐

太平御覽會稽餘姚錢佑以元嘉四年五月初日夜出屋後為虎所取十八日乃自還說虎初

取之時至一官府入重門見一人憑几而坐形貌偉壯左右侍者三十餘人謂曰吾欲使汝知術數之法故令虎迎汝無懼也留十五晝夜語諸要術盡教道之方祐受法畢便遣令還而不知道即使人送出門仍見歸路既得還家大知凶吉無幽不驗

### 賀道養

南史賀瑒傳道養山陰人工卜筮經遇工歌女入病死為筮之曰此非死也天帝召之歌

耳乃以土塊加其心上俄頃而蘇

### 孔靈產

嘉泰會稽志靈產會稽山陰人南齊書孔稚圭傳稚圭父靈產宋泰始中罷晉安太守有

隱遁之懷於禹井山立觀事道精篤頗解星文好術數太祖輔政沈攸之起兵靈產密白太祖曰攸之兵衆雖強以天時冥數而觀無能為也太祖驗其言擢遷光祿大夫以鹿盛靈產上靈臺令其占

侯餉靈產白羽扇素隱几曰  
君性好古故貽君以古物

# 唐

陳闕

畫斷會稽人能寫真開元中召入供奉每令寫  
御容妙絕當時人寫太清宮肅宗真容匪惟龍

額鳳姿日角月宇之狀而筆力適潤風采英逸合  
符應瑞天假其能闕今公之後一人而已歷代名

畫記韓幹陳  
閔師於曹霸

沈乚

太平廣記越州人善卜天寶十四年王諸應舉  
欲入京於乚處卜得純乾卦下四位動變觀卦

沈云公今應舉得此卦觀國之光利用賓於王本  
是嘉兆然爻動羣陰成陽下成乾卦上變至四又  
不至五五是君位未得利見大人恐此行不至  
京而回果至東京屬安祿山反奔走却歸江東



孫位

宣和畫譜會稽人僖宗幸蜀位自京入蜀自稱

醉光啓中畫應天寺壁勢若飛動後改名遇卒不知所在世稱龍水尤位所長

五代

王耕

十國春秋越人善畫尤精牡丹遂為一時丹青之冠孫光祿耕畫牡丹最佳春日張於庭廡間

則蟲蝶萃至

葉簡

開奇錄刻人善卜筮凡有盜賊皆知其姓名有農夫失牛卜之曰占失牛已被邊家載上州欲

知賊姓一斤求欲知賊名十千頭乃鄰人邱甲耳又有將橘子合之令占曰圓似珠色如丹倘能勞破同分喫爭不慙媿洞庭山又將雞子二箇占云此物不難知一雄兼一雌請將打破看方明混沌

時西湖游覽志武肅王左右算術醫流無非名士  
有葉簡李咸者善占筮忽一日旋風南來遶葉而  
轉召簡問之曰此淮帥楊渥已薨當早遣弔祭使  
去耳王曰生辰使方去宜可使弔祭簡曰此必  
然之理速發使往彼若問如何得知但云貴國動  
靜皆預知之王從而遣之生辰使先一日到楊渥  
已薨次日弔祭使至由  
是楊氏左右皆大驚服

# 宋

鄭日新

於越新編越州人  
少善棋世號越童

丁權

萬曆會稽縣志字子卿會稽人善畫竹自述竹  
譜又有鑑湖懶民者賀方回高孫也作平遠細

竹瀟灑  
可愛

劉仲懷

竹派山陰人元佑間徙居諸  
暨善畫墨竹筆法師文湖州

張永

舊浙江通志洛陽人為翰林醫學太醫令李會  
通同時出其方與會通無異但改煎為散耳散  
疾遂愈扈從高宗南渡因家餘姚後登進  
士至禮部尚書所著有衛生家寶行世

元

項昕

兩浙名賢錄字彥章由東嘉徙越江自號抱一  
翁外大父世業醫奉父命謁受其書讀之年未

成童已暗誦岐扁素難王叔和脉經後以母疾醫  
誤投藥死痛之益勵志醫術於是為人治病決死  
生無不立驗平生喜詞章善音律工繪畫而獨以  
醫顯所著有竹窻小隔及脾胃後論子恕能世其  
業萬歷紹興府志昕幼業醫從金華朱彥修錢塘  
陸尚靜集慶戴同父紹興陳白雲受五運六氣之

說治病往  
往奇中

鮑敬

嘉靖山陰縣志字原禮山陰人善畫花木禽魚尤長於人物嘗為折枝牡丹姿態天然

陳憲章

圖繪寶鑑疏如隱居士會稽人工畫梅與王牧之齊名

江仲謙

劉基贈醫學錄江仲謙序紹興人以良醫鳴於郡甲午歲余挈家來紹興地卑濕又寒暑

易常度家人疾病相連屬不絕延仲謙診之劑所技無不愈由是倚仲謙以為安而信其為良醫不虛矣方余家人之疾也仲謙來視曰某當某日愈某當變某疾疾作復幾日愈無不驗有所餽謝則堅拒不受

楊維翰

西浙名賢錄字子固諸暨人畫為何九思所推紫桃軒雜綴楊維翰之兄善寫竹石墨蘭

妙絕  
一時

明

單俊良

兩浙名賢錄蕭山人國初創圖籍覈數俊良上其式有詔命天下法之又以踏車灌田之

勞瓶造牛車以機輪轉之今鄉之牛車單制也

石達

有於越新編諸賢人洪武中辟薦至京師會諸王疾近臣或言達善醫試視之有效自是遂以

醫顯後為  
御醫院使

張德元

霏雪錄近世拆字言吉凶者無如張乘槎按字畫以成卦余一日坐乘槎肆中有二童持

一字來占曰是為吏緣同曹訟之當送刑部苔四  
十即回二童相視默然既而曰皆如先生言予欲

訴政司求決可乎乘槎曰此行不可逾旦矧欲已耶予謂答四十未可知童曰律當然耳乘槎曰今夕非附軍器船即官舫船也童曰果官舫乘槎姓張氏名某字德元乘槎其號云兩浙名賢錄德元避亂山陰有奇術其友病以豐字示之德元曰死矣明日計至或問其故德元曰豐字山墓所也兩丰封例也豆祭器也墓既成矣尚欲生乎嘗飲劉彥昭家曰今夕復有客已而客至問之德元曰吾聞滌器聲故知耳

馮汝賢

弘治紹興府志諸暨人永樂中縣丞善觀字之形體參伍錯綜以知人之休咎所言無不

奇驗

滑壽

紹興府志字伯仁先世儀真人僑居餘姚學醫於京口王居中授以素問難經乃類次手抄而

讀之且為之注已乃參考張仲景劉守真李明之  
三家得其妙又傳針法於東平高洞陽以盡醫之  
神秘由是所療無不奇效能決死生一婦孕患腹  
痛呻吟隔垣聞其聲曰此蛇妖也砭之產數蛇得  
不死又一婦臨產而死視之曰此小兒手捉其心  
耳砭之即甦少頃兒下大指有砭跡無間貧富皆  
往治不報不較也與朱丹溪彥修齊名在淮南曰  
滑壽吳曰伯仁鄞越曰櫻寧生所著有十四經發  
揮三卷及難經本義讀傷寒論抄診家樞要痔瘻  
篇醫韻等書傳於世今子孫為餘姚人知府治是  
其孫葉逢春云壽蓋劉文成基之兄易姓名為  
醫文成既貴嘗來勸之仕不應留月餘而去  
**黃武**於越新編山陰人治舉業不就乃學醫先是越  
人療傷寒輒用麻黃武曰南人質本弱且近世  
人鑒代甚多本已撙而攻其表故人多矣乃  
投以參芪輒取奇效自是越之醫咸祖之

楊宗敏

兩浙名賢錄新昌人永樂間有異僧叩門父館寂之因授宗敏堪輿術遂得神解登山隔

十里許即知作穴所向及倒杖不爽毫釐人稱為楊地仙

周述學

徐階周雲淵傳字繼志號雲淵子山陰人素負經濟尤邃於易歷南游楚北抵燕趙徧詠

天官氏之術聞郭太史弧矢法以圓求圓循弦宛轉極與天肖名曰弧矢經時荆川唐太史博研古算著溪顧司馬精演例法欲求弧矢不可得述學竭其心思撰補弧矢又續中經纂歷議歷學而歷法遂為完書嘗著圖書較理論以彰易之體極爻象著易義以達易之用集京邸之文諧元韻之聲用占經世象識吉凶其他輯會占而參以命法纂通志而徵以世紀準畧極而定道里之數本山河域有界以表形勝星命砂水太乙六壬遁甲演禽



風角鳥占靡不洞其玄微合所纂  
撰凡千餘卷總題曰神道大編

徐蘭

畫史會要字秀夫餘姚人善水墨葡萄風烟晴  
雨曲盡其妙其枝蔓圓轉處藏有天下少人間

無六字行書  
彷彿趙松雪

樓英

弘治紹興府志蕭山人精醫術被召至京以老  
疾辭歸著有仙巖文尚二卷運氣類註四卷醫

學綱目三  
十九卷

范應春

萬歷上虞縣志少負奇氣常自計曰匹夫而  
欲濟人利物惟醫藥乎乃編讀岐黃家言遂

以醫名世一日途遇姻親薛丈龍驚愕曰公病劇  
奈何薛曰固無恙也應春就其家診之陽為好語  
密囑其子曰而翁臟脉已絕特浮陽在外不見劇  
狀耳夜半當疾作及晡而逝矣可亟治後事已而

時刻不爽有按院行部至虞稱病不言所以編名  
諸醫莫曉應春診之曰無他病祇患夜遺耳安神  
保元自己院驟然曰神哉又問曰富貴中人秦養  
安逸然多疾病時服藥餌宴人日勞筋骨奔走衣  
食而鮮病何也應春對曰戶樞不蠹流水不腐院  
大奇之應春取董奉種杏故事自號杏莊有杏莊  
卷藏  
於家

邢元愷

於越新編嶧人  
課卜多奇中

馬時暘

萬厯會稽縣志名暄以字行幼穎悟博通經  
史兼精丹青術尤善於古隸篆孝廟初徵入

華蓋殿供御授  
錦衣衛鎮撫

張員

兩浙名賢錄字一民人字天民會稽人左目無  
瞳子自稱左瞽善草書工畫以筆墨自娛未嘗

為貴勢人一作往往以金  
購之雖值屢空麾之不顧

俞用古

萬歷紹興府志新昌人以神醫名有病人方  
危為延治一人無病避入帳內用古俱診之

曰呻吟者可治初病者膀胱氣絕必死主人大笑  
已而其人果以恣便急泄卒而病篤者竟愈又王  
氏數人忽啞用古見雉毛盈廚曰吾得之矣蓋是  
時雉多啄半夏其毒在內取姜汁飲之立愈一女  
子欠伸兩手直不能下用古曰須炙丹田因  
灼艾詐欲解其視女子驚護之兩手遂下

岑乾

於越新編餘姚人童時從父遊武林或竟日他  
往家人怪之乾曰有羣兒呼與奕自是奕類異

後游京師諸公爭延之名由此顯時又有顏倫者  
稱第一手乾嘗謂與顏奕必謝絕人事乃可乾馳  
名早人謂小岑王元美奕旨今後進中閩有陳生  
蔡生越有岑生揚有方生而蔡與岑尤強甚皆未

可量也

馮道助

紹興府志山陰人有奇術凡里中大噉人者指之則狂獒以死有村夫板築道側見行者

偶妨其業則詈之道助摘草置其上已而所築連堵皆潰三江戌卒侮之遜謝不與較但引之坐石橋上道助既去戌卒踰時不能起道助行三十里許摘草與樵者曰某橋上有戌卒數人可以此草與之樵夫如言戌卒始能去嘗至丁墟呼農夫渡不得遂幻雙鯉躍田中見者取鯉未盡蹂躪後符錄事發有司遣人持牒往捕適與捕者遇於途取捕者公牒去而捕者昏然不見

鄺元真

兩浙名賢錄諸暨人幼學道術年五十而術通能驅雷電宣德間過大部鄉宿農家其家

無烟而火沙石從空中下元真書一符焚之即有大雷震一狐死自是怪遂絕

葉元

紹興府志新昌人幼時渡槐潭溺水見一赤面長鬚人救之不死自是遂通符咒詣五雷祈雨

法成化間郡大旱郡守白公延之祈雨即時大澍府倖女為妖所惑書符懸之少頃震雷擊巨蛇死

女漸愈後不知所終

唐繼山

紹興府志會稽人少喜讀書長而習醫多奇效尤精脉理能決死生於數年之前有脉決

世行

張介賓

山陰縣志字景岳年十三隨父至京遇名醫金英從之遊遂得精醫道為人端靜好讀書

殫心內經著有類經綜覈百家剖析疑義凡數十萬言歷四十年而成西安葉秉敬謂之海內奇書

又作古方八陣新方八陣海內多宗之

俞鵬

畫史會要字漢達上虞人善畫水波遊兩京名重公卿間有巨璫欲薦之即僵臥不肯起其畫

亦不易得  
興至乃寫

陳洪綬

朱彝尊陳洪綬傳字章侯諸暨人年四歲就塾婦翁家翁方治室以粉堊壁既出誠童子

曰母汙我壁洪綬入視良久給童子曰若不往晨發乎童子去累案登其上畫漢前將軍關侯像長十尺餘拱而立童子至惶懼號哭聞於翁翁見侯像驚下拜遂以室奉侯既長師事劉宗周講性命之學已而縱酒狎妓自放頭面或經月不沐客有求畫者雖蜚折至恭勿與至酒間召妓輒自索筆墨小夫稚子無勿應也自稱老遲亦稱悔遲亦稱老遲妾胡淨髮亦善畫花草云

台州府

# 五代

鍾隱

圖畫見聞志天台人工畫鷺鳥竹木師郭乾暉深得其旨乾暉始秘其筆法隱變姓名趙其門

服勤累月乾暉不知其隱也隱一日緣興於壁上畫一鷄子人有報乾暉者亟就視之驚曰子得非鍾隱乎隱再拜具道所以乾暉喜曰孺子可教也乃善遇之遂馳名海內王氏畫苑隱字晦叔其畫在江南者悉為南唐李煜所有煜親筆題署以壘識之

# 元

胡德亮

徐一夔杏所翁傳字叔大別號杏所翁天台人少負羸疾有志讀書父母以岐黃之術有

裨於衛生伴習之有深於其術者悉延致於家為講求補瀉虛實之法盡得其秘用足醫名日振而

翁之志務在濟人，不以貧賤富貴二其心。既授藥，寢食不自安，必俟病家告愈乃已。

姚雪心

畫法年紀黃巖人，工墨竹。竹派雪心畫竹宗文湖州。

葉清友

楊維禎送寫神。葉清友序：天台人，其父可觀，入京師，嘗寓天顏，被命為提舉，梵像監清友。

紹其家傳，當為予寫鹿冠吹笛像於五湖之間。談者謂非徒得予形而實得予神，不在顧長康之下也。

明

王奇

分省人物考。字世英，天台人。為諸生，通天文星數卜筮之學。或曰：有異傳焉。遊金陵，三原公在

兵部，方為權貴所尼，屬奇筮之曰：公歸矣。越三載，其起當銓衡予已。而果然。刑部逸重囚奇筮之遇。



恒之大過曰五為圉圉賊入矣其馬逃之計其獲  
日與時皆不爽陳指揮妻死將斂其女病問命於  
奇奇曰女固無恙其母亦未死後當生二子即欲  
斂其必越午至午時妻復生後果生二子王郎中  
應奎問命奇曰是火氣太盛若官之南所至必有  
火災後守台州郡中災十室九燼嘗遊歡谷山中  
仰見星象嘆曰客星主急變奈何越三日復觀焉  
則喜曰無事矣未幾逆瑾敗此數事其尤異者兩  
浙名賢錄奇性至孝有所得付其弟以養母母年  
九十餘奇為嬰兒以悅之有佳果必袖以奉然介  
甚苟非義雖千金不顧也終身  
不受室以猶子宗元為之子

### 賴賓國

萬厯寧海縣志居十八都膂力過人能手搏  
猛獸缸蜜烏鵲一發疊中城東朱甌善奕世

無與敵時稱  
寧海三絕云

邱良仁

張穀邱良仁傳台州人正德間推命多奇中百戶陶炳以命扣之云將星入命禦敵必得

奇功當陟二級世襲千戶時承平無虞人笑之八年開化江西寇起總制陶琰舉炳將才從參帥李隆勳寇有功果陟二級世襲炳作洞徹元機卷求縉紳詩文以贈之

王乾

獻徵錄字一清臨海人以輕墨淺彩作禽蟲瓜果花草間出山石林藪蒼幽岑往往極妙尤

妙寒塘野水拍泳朝暮之態間作茅屋竹樹雲氣點逗人物灑灑益可玩乾既辛雖尺幅人皆寶之

潘爵

天台縣志字明秩善占氣之術嘗詣所親黃某謂曰汝家十年行且敗矣時黃方鼎盛後漸凌

替揆之果十年也褚某者乘馬經其門曰此人三日後必死至其日果然其家走市中鬻麻布或給爵曰子言某三日後死今復乘馬過何耶爵曰鬻麻布耳人咸異之

趙與慶

黃巖縣志號草堂縣西橋人精岐扁術人有疾求治無不立愈一日有惡疾人臥道中穢

甚行者皆避之與慶獨就前為診視曰六脉延延必是大仙其人即授以二鍼忽不見自是其術益神

林益道

黃巖縣志號心月牟村人四歲讀書日記千言十五歲當七夕與羣兒戲浴江渚有一叟

置蓋於水亂流而濟衆莫見惟益道指示羣兒叟至以手摩其目曰好眼好眼歸即雙瞽臥病二年叟復至其家授以祿命書鄰人為之口授一簡其字即滅自是語禍福無不奇中

金華府

隋

舒綽

兩浙名賢錄東陽人宰相楊恭仁欲遷葬會陰陽家五六輩皆海內知名恭仁未之決遣人馳

往取葬地四隅土各一斗方面形勢悉書於歷密緘之出土示衆言人人殊獨綽定一土批筆識之與恭仁所書之歷無毫髮差綽曰此土五尺外有五穀得其一即是福地世為公侯恭仁延綽至其處掘地七尺得一穴如五石甕貯粟七八斗是地昔為粟田蟻啄之入穴故然時以綽為聖

唐

陳昭

太平廣記僕射房瑄相國崔煥並貶任睦歙州官時有婺州人陳昭相之云後二公並為宰相

然崔公為一大使來江南及至德初上皇入蜀房崔二公同時拜相崔後為選補使巡按江東

婁千寶

呂元芳

雲溪友議浙東李褒聞婺女婁千寶呂元芳二人有異術發使召之

既到便令止從事廳從事問曰府主八座便作何  
官允芳對曰適兄尚書但前浙東觀察使恐無別  
拜干寶所述亦爾從事默然罷問及兄李李曰僕  
他日何如二人曰嵇山聳翠湖柳垂陰尚書畫鶴  
百艘正堪遊觀昔人所謂人生一世若輕塵之著  
草何論異日榮瘁自後李歸義興未幾物故是無  
他拜也又杜勝給事在杭州日問十寶以已為宰  
相之事曰如筮得震卦有聲而無形也當此之時  
或陰人所諧若領大鎮必憂悒成疾可以修禳後  
杜為度支侍郎草麻侍宣府吏以上於杜門構板  
屋將布沙隄忽有東門驃騎奏以小疵而承旨以  
蔣仲侍郎拜杜出鎮天平憂悒不樂去乃嘆曰金  
華妻山人之言果應矣欲令招二人又曰孤  
雲野鶴不知栖宿何處杜尋亦終於鄆州

馬生

定命錄天寶十四年趙自勤合入考有東陽縣  
替者馬生相謂云足下必不動縱去亦却米於

此祿尚未盡後至三品著紫又云自六品即登三品自勤其年果不入考至冬有勅賜紫乾元二年九月馬生又來自勤初誑云龐倉曹家生捏自勤骨云合是三品與趙使君骨法相似所言年壽并官政多少與前時所說同

## 宋

### 潘衡

墨史金華人蘇子瞻云衡初來儋耳起竈作墨得烟豐而墨不甚精因教其速爇寬籠得烟幾

減半而墨乃彌黑其文曰海內松煤東波法墨皆精者也衡今在錢塘竟以東坡故售墨價數倍於前然衡墨自佳可與九華朱瑾上下也

### 李明甫

兩浙名賢錄東陽人善醫尤精針法義烏令病心痛垂死李明甫視之曰有蟲在肺下藥所

不反惟礙乃可然非易也謬謂於背上點穴密取水以喫之令方驚而鍼以入曰蟲已死矣既而腹大痛下黑水數升蟲亦去遂愈

盧鴻

萬厯金華府志字碩父舉進士善仙卜鄉人周師銳既中省問之曰當魁多士且曰熟讀程易

師卦已而廷對問師律之旨遂舉第一人又善驅邪有條桑者忽墮地嘔血而死鴻曰行持可也宜靜聽之頃四山皆鬼叫病者忽呻吟嘔血數升而甦

陳堯臣

揮塵後錄婺州人善丹青宣和初登科為畫學正王黼薦於上擢水部員外郎假尚書使

遼堯臣即挾畫學生二員俱行繪天祚像以歸升圖其山川險易以上上大喜擢右司諫

湯衡

文獻通考湯氏嬰孩妙訣二卷東陽湯衡撰衡之祖民望精小兒醫有子曰麟登科衡麟之子

尤邃於  
祖業

湯駿

正德武義縣志邑之妃山人少讀書累舉不第  
遍遊淮汴間歸結廬以居號曰默庵素能醫中

年既絕仕進而術益精妙建炎間娶守室女患蟲  
病醫皆不效郡倅以駿薦使診視駿曰非蟲也已  
成胎孕矣然猶不可治守不樂其言駿遂謝去倅曰  
彼既言可治何不試之復追駿至駿命作一大桶  
盛水女坐其中既飲女藥復以藥投水中俄產一  
物其狀如蛟但無角耳家人驚愕失色駿曰無恐  
此因舟經江湖為蛟蜃所惑耳今  
可賀矣復以藥調治平復如初

范疇

萬曆金華府志字復初金華人宋建紹間得江  
西張九千著易之占神妙莫測抗有無籍子胡

婆壽負罪而逃捕者即疇求筮文成疇曰可於北  
方樹中得之如言迹至臨平果獲於空楊柳中遂



繫獄後會赦出欲報疇持刀晨叩疇門給以卜欲殺之疇決以占知其將不利於已隔門問之曰欲

卜可擲下手中心刀胡閩之駭服猶以刀畫其門而去疇由是避居於蘇設肆來問莫不神異

王用和

志雅堂雜鈔賈師憲用婺州碑工王用和翻刻定武蘭亭凡三年而後成至賞之以勇爵

絲毫無遺憾幾與定武本相亂

元

厲周卿

山居新語婺州人精卜術天歷間游京師一日揚垢寫一上字卜之厲即對本鈔錄姓名

出處之說皆如所見後一段云商量更改事佳會喜金羊寅巳同申主好事喜非常其應果在十年後豈非萬事皆分也

# 朱震亨

婺書字願修義烏人所居曰丹溪或稱曰丹溪生習醫於羅司徒知悌治疾往往以意為

之巧發奇中按之書無有也諸醫皆驚已而訕且排之卒乃大服其名藉甚遍浙東西以至吳中罕不知有丹溪生者所著有宋論一卷格至餘論若干卷本草發義補遺若干卷金華達達傳丹修聞許謙承考亭之緒摳衣至門執弟子禮後母病延醫因自悟曰人子而不知醫或委之庸夫寧無失乎於是參究醫學所治多獲奇效

# 王鏡澤

正德蘭谿縣志純孝鄉人家貧好讀書不偶於時遂肆力醫學遊大都實太師漢卿之門

二十餘年悉傳其術以歸實囑之曰傳吾術以濟人使人無病即君之報我也遇人有疾施針砭無不立愈至元初徵領揚州教授以母老辭所著有重註標幽賦傳於世

明

劉日新

金華雜識曰新金華星者太祖下婺召推命曰極富極貴太祖怒其不言官職劉請屏左

右曰極富者富有四海極貴者貴為天子上喜洪武四年召至問所欲富貴皆對不欲惟欲求一符遍遊天下上題所御白扇賜之識以御寶劉持之遍遊焉

戴思恭

今言類編字元禮以字行金華人學於丹溪朱顏修初任御醫事太祖藥餌輒效洪武三

十一年五月召諸醫官治疾無狀者盡付獄獨召原禮至榻前曰汝仁義人也事無預太孫即位誅諸侍醫者獨拜原禮太醫院使發書初文皇為燕王時嘗患瘕久不愈召原禮視之因問王嗜何物曰生芹曰得之矣投一劑夜暴下視之皆細蛭也遂愈而浙名賢錄松江諸仲文盛夏畏寒常御重

鰾飲食必令極熱始下噤微溫即嘔他醫投以胡椒煮伏雌之法日啖雞者三病愈劇原禮曰脉數而大且不能助痰祇益其病耳乃以此之謂也椒發陰之火難能助痰祇益其病耳乃以此之謂也椒發之晝夜行二十餘度頻減鰾之半後以黃連導痰湯加竹瀝飲之竟瘳姑蘇朱子明之婦病長號數十聲暫止復如前人以為厲所憑莫能療原禮曰此鬱病也痰閉於上火鬱於下故長號則氣少舒經云火鬱則發之是已遂用重劑涌之吐痰如膠者數升乃復初卒年八十二著有訂正丹溪先生金匱鉤元三卷間以己意附著其後又有證治要訣證治類方類證用藥總若干卷皆彙括丹溪諸書而為之

虞搏

萬歷義烏縣志字天氏博覽羣書能詩因母病攻醫精於脉理診人死生無不驗韓方伯聞其

名聘令驛送往見雅敬重焉治病之餘叩問醫道  
搏告以節嗜欲戒性氣慎言語謹服食乃攝養之  
要韓益加禮敬著有醫學正傳方  
脉發蒙百字吟半齋稿行於世

楊云

兩浙名賢錄武義人業醫名動一時宣德乙卯  
召至京師入對稱旨超授御醫適英宗勿怡樂

進有效陞太醫院使賞賚甚厚舊名榮英宗  
以其與楊尚書名同不便宣召賜更名云

王葯

六硯齋筆記字子約金華人善畫竹多用鉤勒  
與蘭谿徐良甫梅徐舜舉書號三絕蘇伯衡嘗

為鉤勒竹  
歌以美之

朱月檻

畫髓元詮逸其名蘭谿人以善畫荷花得名  
所居之傍有小池植荷數品於其中構亭其

上終日坐觀以察荷之消長榮悴苗葉花實容色  
態度方舉其真得之者以為珍玩號月檻荷云

孟態

嘉靖金華縣志任醫學訓科精於針灸其所點穴不循常法往往有神驗自後其法鮮有能知

之者

章明道

東陽縣志善醫長於傷寒李進士謀與僕王四同日病章診之曰進士脉順可生王四脉

逆當死七日進士大汗而解王四死又嘗與同遊道旁一家哭甚哀因問之傷寒死矣明道曰容吾

一視之或可生也其人曰死半日且小斂矣明道入視之曰此厥耳與藥灌之立甦

金養素

東陽縣志邑之十九都人精太素切脉決人壽夭死生悉應如鸛至倉卒奇症衆醫束手

却避養素談笑治之無不效者

郭桂

金華府志字時方其先有汪夫人者以善醫婦人顯於宋掌內府藥院事以功封溫國太夫人

子孫世承其業隨宋南遷散居於浙之東西杭紹者其族也而金華之族有名化龍者又遷於蘭谿後生桂醫道甚明起死回生百不失一

### 葉容

正德蘭谿縣志字可法橫山鄉人博通羣書貫穿史籍嘗從鄧太史習天官之學事之數十年

精於其業言天象休咎證應毫釐無失其所著有太乙三辰顯異經十卷

### 徐應明

湧幢小品號漱溪蘭谿人少與趙文懿公同學趙日有名應明意不自得一日謂文懿曰

汝醫國吾醫民各行其志可乎趙曰國醫賒且不必效民醫實人求而我應之造化在手矣遂從時師遊廐而去之遇異人有別傳決生死遠近皆奇驗遊楚中諸名公爭致之有欲傳其術者曰必有活人心地則可蘇中翰維霖有隱疾診之言狀約於一年前無一字虛發蘇將師事之忽一日卒人

以爲遺  
坑也

孫櫓

金華府志號南屏東陽人性穎異精岐黃五都  
有單姓妻將產死三日心尚溫櫓適過之一劑

而甦竟產一男又有人頭生瘤痒甚櫓曰此五瘤  
之外名爲風瘤決破之果取出風枕許遂痊著有  
醫學大成活命訣  
脉經採要等書

國朝

徐應顯

金華府志字子祐永康人業儒精醫術多所  
全活晚年益精歷游公卿間貧寒以疾請卹

畝救之所著有醫方積驗御史牟雲  
龍表其廬曰儒修相業年八十餘卒

衢州府



宋

張鬼靈

春渚紀聞三衢人其父使從里人學相墓術忽自有悟見因以鬼靈為名蔡靖安世先墓

在富春白昇嶺其凡宏延鬼靈至墓下視之謂宏曰此墓當出貴人然必待君家奉覓中飛出鶴鵝為可賀也宏曰前日某家臥房未覓中忽有此異方有野鳥入室之憂鬼靈曰此為克應也君家兄弟有被魁薦者即是貴人是秋安世果為國學魁選

余聽聲

夷堅志三衢余山人善相氣色又工聽器物聲嘗至婺源邑士李熙仲家試其術使立戶

外而自登廊上鼓梯執兩椎敲擊數四乃呼入問之曰鼓有雙聲當應兩子弟喜慶事是歲淳熙十

三年及秋試  
二子皆薦名

祝不疑

春渚紀聞近世士大夫慕無出三衢祝不疑之右者紹聖初不疑以計偕赴禮部至都為

里人拉至寺庭觀國手棋劉仲甫在馬衆請不疑與仲甫就局始下三十餘子仲甫拱手曰敢問官人姓氏鄉里衆以信州李子明對仲甫曰仲甫雖不出國門間衢州祝不疑先輩名品高著若審其人則今日適有客集不獲終局當俟觀詣行館盡藝祇應也衆以實對仲甫再三嘆服曰名下無虛士後雖數相訪竟不復以棋為言蓋自知不敵恐貽國手之羞也

葉茂實

癸辛雜識三衢人造軟帳烟法以木作暖閣高足其上以紙罩地為帳高七八尺於閣下

用碗數十貯油炷燈閉之密室油氣透頂其輕且速與他煤絕異膠法甚奇中用紫礦當歸秦朮腦麝盡燕支沒石子之類蓋取其活膠而不滿也故經久而色光不少渝

元

沈裕

楊維禎送沈裕序三衢沈生裕自其大父東臯予代為墨以絕藝繼古間人之稱故裕所傳若

有心法之秘者非人之所能識也

顏輝

畫法年記字秋月畫鬼尤工筆法奇絕有八面生意家藏集秋月畫鬼尤工筆法奇絕有八面生意

明

朱暉

萬歷龍游縣志字德明善天官家少從鄱陽趙友欽學得其筆象新書日夜研究業遂精胡大

海取金華暉獻平天下三策大海興之命領兵從攻衢州所撰有三振顯異經子謀齋尤精卜筮以術授方明明後以地理聞所葬地多驗

時儼

四友齋叢說字若思號晴川開化人以焦墨作山水人物皆可觀衢州府志儼嘗自題云書法

即畫法也暇翁之充筆充而有致取妍則惑矣松江何良俊稱新安汪海雲法近正而墨氣遠不及

儼他如蔣三松張平山輩俱不堪供指抹其見推服如此

伍子安

正德江山縣志幼通經史長選於醫請者如市皆不責報郡守張實薦為御醫所著有活

人寶鑑十卷學士宋濂志其墓孫敬中尤能世其業療奇疾甚衆

虞謙

開化縣志號樵谷善琴嘗聽人讀大學聖經倚而譜之作尚調曰讀書聲其高弟汪一恒為續

中庸語孟之首篇知音者竟賞之

徐暘

常山縣志字用輝邑之東山人自其先梅友翁以醫名於宋至暘大顯善於脉理精窮微妙江

山一少年每患陰兩骨疼暘診之曰隱毒深遠非遺體即胎體也其人愕然不省歸詢其母蓋孕時巨痛未全瘳也衆始神之又有徐氏婦患疾臥床暘診之曰此千日病藥與否期滿則起後果如其言

余世規

萬歷龍游縣志善軒岐術凡經其藥石者罔不獲效求者無貧富咸濟之衢州府志正統

間授本學訓科

祝望

崇禎衢州府志號海鶴龍游人善琴為浙操之師尤長於詩

嚴州府

唐

孫晤

聞奇錄家貴賤貧富官祿人口數亦知穴中男女老少

因某病而卒兼精三奇時楊集統師收復睦州至一巖下砦軍次忽一大石盤墜下楊占之曰此巖

上有二十五人點兵收之獲居民二十人還楊曰合有二十五人何欠五人也民曰某等初聞大軍

將至遂與二十五人同避於此內一人孫晤善卜到時立草舍畢有雙堆飛下孫曰軍至此矣宜往

別處不然遭擒某等不順其言有信之者四人相隨去矣楊曰得此人可師事之新定平後復在瀨

上漁

五代

方生

天中記錢元懿為新定時有士方生人號為龜精常疏卜辭以貽元懿曰太乙接天河金華寶

貝多君侯六十六別處  
下經過後皆如其言

元

李康

續弘簡錄字寧之桐廬人書畫琴奕冠絕一時

林文耀

建德縣志字絢齋幼即工書筆法遒勁中年夫明臨池之興終不能忘乃剪紙為字勢飛

動若龍蛇點畫不差毫髮人驟見之初不辨其為剪字也室人裝潢成軸易薪米以自給至今傳曰  
林剪桐  
絕技焉

明

方叔和

嚴陵志字節之建德人由儒醫授本府醫學正科精醫兼讀儒書成化中陞授御醫弘治

四年奉旨視岐王疾屢受白金文綺之賜八年陳乞歸田英國公張懋保國公朱永暨士大夫咸為

文以贈

吳嘉言

萬歷嚴州府志分水人世以醫名盡得素難等書玄妙授太醫院吏目有名譽禮部尚書

潘晟徐酒余有丁皆有贊贈所著有醫學統宗鍼灸原樞等書行世子學易亦以醫名後授雷州吏目

仇鳳翔

建德縣志字敬家幼習醫比壯通悟方脉諸書尤善療小兒疾不用藥餌但視其經絡所

至以手摩按令汗出立愈

余德

遂安縣志字懋之精堪輿之學衢嚴之吉兆多其裁定同時周儼亦以地理學齊名



溫州府

唐

蔣直

太平廣記永嘉人天寶十二載直云郡城內有白幕太守李江忽丁憂李欲歸江北蔣又云公

至縉雲郡却回當有一緋一綠一碧一人來相推按然終無事後果抹訪使張愿着緋大理司直杜喬着綠判官張璘着碧來按遇赦而止

宋

葉谷

春渚紀聞永嘉人作油烟墨絕妙與潭州胡景純相上下

毛信卿

圖繪寶鑑失其名溫州人放意詩酒盡竹自給號箕山杭人得其片幅轉售於市輒爭取

之自言大竹畫形小竹  
畫意得法於趙牧之

何生

癸辛雜識平陽縣八丈村人雖為傭而能談五行有一士人以命來叩何云有孚方可免災問

弄璋耶弄瓦耶答曰也弄璋也弄瓦不知為何等語而去後果學生一男一女

劉拱辰子

萬歷溫州府志永嘉人逸其名徽宗政和間以方技至京師甚見寵幸封為純和處

士名其里  
曰純和里

馬宋英

畫史會要溫州人至錢塘遊淨慈寺寫古松於壁題云磨殘一錠兩錠墨掃出十年萬年

樹月明烏鵲誤飛來踏枝不着空歸去丁大全丞相賞其詩畫急命索之人忘其能閱不令出卒不遇此成詩識作  
墨梅竹更妙

釋仁

舊浙江通志永嘉人善畫一夕夢見龍四百條自足益臻神妙每醉揮墨汁醒後乃補之人物

花鳥形  
狀極肖

元

王振鵬

畫法年紀字鵬梅永嘉人工山水畫史會要官至漕運千戶界畫極工綴仁宗春愛之賜

號孤雲處士道園學古錄振鵬之學妙在界畫運筆和墨毫分縷析左右高下俯仰曲折方圓平直曲盡其體而神氣飛動不為法拘當為大明宮圖以獻世稱神品

陳時敏

溫州府志瑞安人號復心有智慧通經史嘗玩後天圖及璇璣玉衡之說家設一石盆刻

周天度於上自構巧法占之仍於高山平衍處鑿竹為圭冬夏測景夜則仰觀星辰次舍雖遲留伏

逆之難齊者推算皆晰時司天歷法頒行多不驗  
閩浙間盡用其歷稱為溫歷至正壬辰正月朔日  
食榜示司天臺初食刻數時敏辨其差訛果如其  
言後徵不起薦其友張洙應命洙以其法入臺局  
正其舛誤臺  
歷遂得其宜

陳相心

名揚維楨字說贈陳相心永嘉人以折字  
名於公卿間推原禍福考索成敗無不驗

陳宗山

西浙名賢錄平陽人究心歷數遍遊江湖未  
得其要及歸欲受業於陳時敏適時敏卒得

遺書研精覃思得不傳之妙於文字間時敏之徒  
所推歷多有舛訛宗山校正之十數年言歷者皆  
推宗山溫州府志子子盛  
亦以通知歷數授歷官

夏迪

書畫譜字簡伯温州  
人工畫山水竹石

明

鄭希誠

瑞安縣志年十八入山遇異人與語授以果

老五星一帙為別自此意見旋發舉五星推

之輒驗求推者填門其法問人生辰即書所生之

七政四餘及干支化曜於盤上倒懸之仰觀至旬

月人之壽夭禍福窮通歷言之錨鉢不爽嘗與

友對飲談及生命鄭曰明日我與汝各有官刑汝

更倍之其友素信鄭乃拉避寶香山寺鄭曰不可

避也第為之至期果有縣尉詣寺覓僧不至索得

二人怒以為僧侶各杖之友私念奇驗顧鄭而笑

尉怒倍杖之其占應率類此卒後書不傳今所撰

占詞七十二張行世永樂中

汪庭訓效其術亦名取驗

謝廷循

萬歷溫州府志永嘉人善繪永樂宣德

間思齋最優授錦衣衛十戶尋陞指揮

郭純

東里集永嘉人初名文通精繪事事太宗賜名純推營繕所丞洪熙初陞閣門使水東日記長

陵於畫最愛永嘉郭文通有言夏珪馬遠者輒斥之曰是殘山剩水宋偏安之物也何取焉東海集文通充內供奉宣廟嘗面促之畫不即執筆以死怵之對曰若書樂畫寧死不取草草上為霽威

金子性

萬歷溫州府志永嘉人其先世嘗遇異人授以內消丸一方永樂六年取就內府樂院中

制丸以進授太醫院未久賜鈔歸田養老

虞君平

樂清縣志其先永嘉人仕太醫院永樂初樂清大疫君平藥之悉愈邑人德之遂留居焉

子孫世其家

包容

永嘉縣志善書畫工篆章萬歷間授中書舍人張江陵當國雅愛重之一日以玉章相屬已鐫

就促之急容怒磨  
而返焉遂拂衣歸

周驥

樂清縣志為人沉靜工書永嘉小鮑技  
絕天下獨稱其吐吐逼人乃心畏之

虞僂

温州府志永嘉人字君大工書真草篆隸無一  
不臻其妙萬歷間朱宗伯之蕃考入儒士上等  
凡宦遊於甌者無不禮重焉至今甌人善書  
者必以為得虞家筆法云凡岱亦以善書名

## 處州府

宋

王伋

括蒼彙記字肇卿一字孔彰其先汴人祖訥因  
議王朴金雞歷有差衆排之貶居江西贛州伋  
幼務舉業再舉不利因棄家浪遊江湖愛龍泉山  
水遂家於松源伋生而穎悟明管郭地理之學納

交於何管鮑張諸家為之卜葬隨有何太宰管樞密鮑制置張諫議者出卒後門人葉叔亮傳其所

著心經及問答語錄范純仁跋之

劉夢求

陳亮贈術者劉夢求序括蒼劉夢求未嘗得邵氏先天數而知人休咎說冥昧中事如燭

照而面詰也或曰有術或曰是有神焉劉術行於三衢今遂為衢人士大夫之過衢者以不問夢求

易卦為恨

趙初暘

兩浙名賢錄字必復縉雲人生而神異右掌有雷使二紅字掌道術能役使鬼神治疾無

不愈歲早呼吸可致雷雨時令小兒伸掌書一雷字握之開手則雷鳴兼能辟邪常賣雨於臨安市

墨汁咒符雨點皆黑人皆稱為趙雷使



毛梓孫

松陽縣志字守庸崇禎處州府志好軒岐術受業於顧希武時御史吳叔潤病瘡環醫無

措梓孫以數劑瘡之程思與病惡寒已易膏梓孫曰可生使掘冢冥火設鱗令臥其上覆以重衾用釜煮藥蒸之即起人以神醫目之

陳言

括蒼彙記字無擇青田人敏悟絕人長於方脉治病立效有不可抹者則預告以明器無爽作三因方論研窮受病之源用藥之等醫者宗之其徒王碩為易簡并三論行世文獻通考言撰三因極一方六卷三因者謂內因外因不內外因其說出金匱要畧其所述方論往往皆古書也

元

張夢庚

兩浙名賢錄松陽人遇異人授易元末召居將幕推步有驗後復垂簾於市賣卜一日有

葉姓者無子多娶妄求卜夢庚以詩二句授之曰  
不是桃花貪結子更教人恨五更蜂持歸謂此老  
風字且不識何談理數乎其人秦蜂數十箇一  
旦蜂逸冒而收之忽集其面螫而死人以爲神

明

陳伯光

劉基贈陳生序以醫名於括括故多良醫而  
伯光爲能世其祖父業傳有之曰醫不三世

不服其藥蓋其傳之也速而試之也詳其可信而  
無惑也宜矣伯光嘗曰三才一理治道無二天地  
將病侵祥豫形人生將病氣色先徵病之將至其  
幾乃萌防微遏幾百病不生幾動形見力倍功半  
知及此者其神人  
乎予甚聽其言

祝定

崇禎處州府志字伯靜麗水人以醫術鳴洪武  
初授本府醫學提領轉正科註實太師標幽賦

醫學咸

宗之

陳德顏

書畫譜松陽人善畫真宋濂時傳神陳德顏序京都之間天下藝為之所萃至如德顏者

什伯之中  
僅一見焉

鄭孟純

兩浙名賢錄麗水人多藝術尤精音律洪武初詔州縣儒學以雅樂釋奠頒其成書於天

下時無知者孟純獨能按其音律以教諸生上聞而嘉之詔入成均與冷謙等共定一代之樂

徐進

括蒼彙記字公蘊縉雲人性機巧學丹青尤精於寫神凡人一經目雖數十年後寫出逼真子

迪得  
父術

吳金陵

括蒼彙記龍泉人字邦畿父遊太學生於金陵學舍因名讀書過目輒成誦善畫鷹妙傳

神尤長於琴所著有  
畫鑑直指琴譜指南

### 周漢卿

名山藏松陽人以醫名括蒼蔣仲良為馬所

蹄睛突出如懸桃羣工曰絲絡既損法當督  
漢卿封以神膏越三日如初華州陳明遠瞽十

年矣漢卿曰

尚可鍼為之翻睛刮翳欬然辨五色

武城男子病胃痛不可忍奮擲乞死勿得漢卿納  
藥其鼻竅中俄吐出血赤寸餘口眼咸具痛旋止  
諸暨黃生背曲須杖行醫以風治之漢卿曰血溢  
也為刺兩足崑崙穴頃之杖去其神效如此

### 俞存熙

崇禎處州府志龍泉人能詩善畫山水師事  
永嘉趙仕謙而筆趣過之永樂中召為金門

畫士未幾引疾還

子原澤亦善畫

### 聶瑩

括蒼彙記得湖州凌漢章針法針至病起雖厚  
良可按穴而定不以錢帛介意人爭迎致之

呂文英

戒庵漫筆處州人孝宗朝畫士呂紀以翎毛呂文英以人物一時皆被恩寵人呼文英為

呂小

宋宗遠

崇禎處州府志縉雲人丰儀峭古多術能文工畫山水筆格道勁得烟墨之奇態為畫者

所宗

項賢輔

兩浙名賢錄龍泉人能詩工草書人有得其書以易鹽者商計字酬之每字酬鹽百斤遂

擅名一時  
綽曰草賢

吳伯參

括蒼彙記精太素脉指晰人修短禍福無勿驗

欽定四庫全書

浙江通志  
卷一百九十七

浙江通志卷一百九十七

欽定四庫全書

浙江通志卷一百九十八

仙釋一

三教雖殊其理則一蓋三歸二諦原本自修抱一  
守中實叅儒訓究其指趣皆足以覺牖羣蒙助揚  
教化浙地蘊靈毓秀縉流羽士多托跡於此考宗  
風而披仙錄其人斯在有可稱述者志仙釋

杭州府

上古

赤松子

列仙傳神農時雨師也杭州府志富陽赤松子山相傳赤松子駕鶴往來時憩於此故山

以名

周

董雙成

歐陽經妙庭觀記西王母之侍女其得仙不知幾千百年之久而金丹迄今不變富春西

北有山秀拔雲煙縹緲邑人曰此董雙成宅也富陽縣志宅即臨湖妙庭觀雙成煉丹宅中丹成自

吹玉笙駕鶴昇仙邑人立橋望之因名望仙橋宋紹興初道士董行元掘土得銅牌有字云我有蟠

桃樹千年一度生是誰來竊去須問董雙成字畫精楷其背有王母乘鳳傍有雲氣亦一奇事云



漢

張道陵

神仙通鑑字輔漢留侯八世孫建武十年生於吳郡天目山時黃雲覆室紫氣盈庭年及

冠身長九尺二寸龐眉廣額綠睛朱頂垂手過膝美鬚髯望之儼然從學者十餘人天目山南三十

里西北八十里皆有講誦之堂臨安神仙觀餘杭通仙觀即其地也永元四年樂蜀之溪嶺深秀遂

隱其山按方煉龍虎大丹三年丹成年六十餘餌之而容貌益少永壽二年九月九日在巴西赤城

渠亭山中太上遣使者并五帝部從持玉冊授正一真人之號以盟威都功等諸品秘籙斬邪二氣

玉冊玉印授其長子衡於雲臺峰白日昇天時年一百二十三歲也筆叢道陵教法凡祈禱服罪之

人以三符授之一着山上一地下一水中

桃俊

太平御覽字翁仲錢塘人少為郡吏漢末棄世入增城山中學道過東郭幼平秦時人久

隱增城得道者也教俊服九精煉氣輔星存心之術俊修之道成

晉

葛洪

晉書本傳字稚川句容人性寡慾不好榮利遊餘杭山見何幼道郭文舉目擊而已各無所言

時或尋書問義不逮數千里崎嶇冒涉期於必得尤好神仙導養法從祖玄得仙以丹術授弟子鄭隱洪乃就隱學悉得其法後師鮑玄玄以女妻洪洪傳玄業兼綜醫術咸和初選為散騎常侍不就聞交趾出丹砂求為勾漏令乃止羅浮山煉丹優游間養著內外篇凡一百一十六篇自號抱朴子因以名書仙苑編珠年八十一兀然若睡而坑方與勝覽天竺山乃葛稚川得道之所

杜子恭

宋書自序錢塘人通靈有道術東土豪家及京邑貴望並事之為弟子執在三之敬搜神

後記子恭常就人借瓜刀其主求之子恭曰當即相還耳既而刀主行至嘉興有魚躍入船中破魚

腹得瓜刀南齊書孔稚圭傳稚圭父靈產東出過錢塘北郭輒於舟中迷拜杜子恭墓

許邁

初學記字叔元一名映嘗謂餘杭垂雷山延陵之茅山是洞庭西門潛通五嶽陳安世茅李偉

常所遊處於是立精舍於垂雷而往來茅嶺之洞室晉永和二年移入臨安西山登巖茹芝渺然自得終焉之志乃更名元宇遠遊著詩十二首論神仙事嘗與王羲之書曰自山陰至臨安多有金堂玉室仙人芝草左元放之徒漢末諸得道者在焉後人莫測遠遊所終好道者謂之羽化名勝志大滌山其中峰曰白鹿山又名嚴山山有許邁升天壇及丹竈遺跡

杜曷

洞仙傳字叔恭錢塘人早孤事後母至孝師餘

張顛南也汝應傳吾道法故來授諸秘要曷每入

靜燒香能見百姓三五世禍福章書符水應手即

驗桓溫北伐問以捷不曷云明年三月專征當挂

其鋒溫至枋頭水涸糧盡為鮮卑所躡謂弟子桃

葉云恨不從杜先生言苻堅未至壽春車騎將軍

謝玄領兵伐堅問以勝負曷曰我不可往往必無

功彼不可來來必覆敗是將軍効命之秋也堅果

敗隆安中示期化去詣道民弟子為之立碑謚曰

明師

裴氏姥名勝志餘杭人嫁西湖農家方輿勝覽姥採

眾花醞酒經數年忽有三人至姥所各飲數

斗不醉謂姥云予非常士知姥當仙故來相命因

投藥數九姥餌之月餘不知所在王介甫詩綠淨

堂前湖水綠歸來正復有荷花  
前若見餘杭姥為道仙人憶酒家

**慧理**

佛祖統紀咸和元年西天沙門竺慧理至錢塘武林山驚曰中天竺靈鷲小嶺何年飛來此地

邪因名天竺山飛來峰建寺曰靈隱仙翁葛洪書額釋氏稽古略有洞舊有白猿呼之應聲而出宴坐之巖號理公巖今瘞瘞存焉

**寶掌**

西湖高僧事略中印土人魏晉間東遊自云六百七十三歲周威烈王十二年丁卯生左手握

拳有珠在掌中因以為名始抵峨嵋五臺南返衡廬入建鄴與達摩遇於梁朝遂扣法焉泊來二浙愛天竺之勝結茅而居者四十五年復往四明天台及諸名山遊歷將遍唐貞觀十五年還竺峰久之移居浦江寶巖顯慶二年正月旦手控一像九日而成與其貌無異即告徒曰吾誓住世千歲自來

支那忽四百歲今已過七十有二年矣說偈而化  
世稱千歲和尚遺記滅後有僧來取吾骨勿拒越  
五十四年刺浮長老至彼作禮增戶脩開得其骨  
皆連鎖金色因持來別建增藏之為中竺開山始  
祖

曇翼

蓮社高賢傳餘杭人初入廬山依遠公後入闍  
中見羅什東還會稽入秦望山誦法華經十二

年有女子身披綠服攜筠籠一白豕蒜兩根至師  
前曰妾入山採薇日已斜豺狼縱橫歸無生理敢  
托一宿師却之力復哀鳴不已遂令居草牀上夜  
半號呼腹痛告師按摩師解以持戒不應手觸女  
號呼愈甚師乃布裘錫杖迷為按之翌日女以綠  
服化祥雲豕變白象蒜化雙蓮凌空而上謂師曰  
我普賢菩薩特來相試郡太守孟頌聞於朝勅建  
法華寺初餘杭山沙門法志常誦法華有雉巢於

菴側翔集座隅若聽受狀如是七年雄殞即為瘞  
之夜夢童子拜曰因聽經得脫羽類今生山前王  
氏後其家設齋志方踵門兒曰我和尚來志撫之  
曰汝我雄兒也解衣視腋下有雄毳三莖七歲出  
家十六落髮以腋  
有毳因名以異

## 南北朝

慧靜

咸淳臨安志本姓邵餘杭人勵行精苦容止可  
觀顏延之嘆曰荆山之玉惟靜是焉著文翰集

卷十

僧瑜

咸淳臨安志本姓周餘杭人宋孝建二年滅度  
後十有四日房中生雙桐其徒以為娑羅寶木

因號為雙桐沙門  
吳郡張辨為傳讚

曇超

佛祖通載居錢唐靈苑山一夕有異人至曰此邦蒙師留蒼生之福然富陽民無故鑿山麓斷

壞犀龍之室龍怒不致雨今二百日矣欲法師一往誨龍為蒼生請福豈有意乎超曰此檀越事吾何能為神曰弟子力能吐雲不能致雨超諾之至赤庭山為龍說法俄大雨因止臨溪縣令聞超在辦舟迎之超即日遁還靈苑西湖高僧事略超姓張氏清河人常夜講經有一老人來聽詰其姓曰我能也師曰吾此地無水汝能致之乎老人即撫掌泉自湧出今玉泉是也嘉定三年賜號靈悟大師

僧旻

續高僧傳天監七年帝以法海浩瀚淺識難尋救莊嚴寺僧旻於定枯上寺贊眾經要鈔八十

八卷咸淳臨安志本姓孫富陽人普通後隱居虎邱時蕭昂出守吳興欲過山展禮旻曰吾山藪病



人無事見二  
千石竟遁去

寶達

高僧傳號利法師以持密咒為恒務其院中有印沙牀照佛鑑浙江潮大至激射湖上諸山

達哀其桑麻之地悉變為江遂誦咒止之夜有偉人玄冠朱衣謂達曰師慈心為物員聞命矣自爾西岸沙漲彌年還為百姓殖利後罔知所之

隋

貞觀

西湖高僧事略字聖達錢塘范氏世本顯仕師生有奇相出家通經律論謁天台智者請受禪

觀智者以師齊年止為法兄弟開皇十五年於靈隱山頭陀石室宴坐眾建南天竺寺請師居焉足為開山始祖常講法華以為心要感臯亭神請講捨祠宇為佛殿每盥洗餘滴地不為濡人尤異之

師有雅操文帝三徵秦王兩延皆以疾辭大業中  
因山行自標葬地夢與智者同輩異佛還山覺而  
嘆曰吾六十二應終以講法華力延一紀今七十  
四生期畢矣中夜入寂瑤在東岡天中記貞觀左  
掌仙文右掌人字口流津液充潤榮府八歲通詩  
禮和庾尚書林擒之作沙門洪偃謂曰觀高多知  
耳白有名我有四絕爾具八能謂義導書詩辨貌  
聲恭是也時人語曰錢唐有貞觀佛法當天下一  
半

唐

徐五真人

東天目志兄弟二人號大徐五小徐五大  
歷初於東天目山學道上昇後梁乾化中

建太清觀即今紫陽宮又有石室嘗見陰靈怪氣  
生於白晝乃其修仙煉丹之所妹徐仙姑隱於東

天目山北有石菴與深坑相鄰  
形若道家輪藏姑於此成道

### 徐靈府

全唐詩傳自號然希子錢塘人西天目志靈府由天目趨天台憩雲蓋二十餘年俄結廬

居石屬睇松竹外環池島名以方瀛修煉其間作言志詩解武宗之徵絕粒久之凝寂而化著元鑑

五卷及三  
洞要略

### 馬湘

續仙傳字自然杭州鹽官人世為縣小吏湘獨好經史攻文學乃隨道士編遊後歸江南嘗醉

於湖州墮雪溪經日而出衣不溼永康縣東天寶觀前有枯松湘指之曰此松已三千餘年即化

為石自後果化為石或有以疾告者以竹杖指之口吹杖頭如雷鳴便愈所遊行之處或宮觀巖洞

多題詩句後歸故鄉省兄遽卒乃葬於東園時大中十年也明年東川秦劍州梓潼縣道士馬自然

白日

上昇

潘先生

名勝志潘先生建天柱觀禁樵採為長生林嘗有少年寄止其居六十日不飲食將去傳

以異術能知九州內外吉凶既而曰問人何用知是乃却之一夕少年復來授之符篆祛疾法赴之者如市十餘年尸解

閻丘方遠

吳越備史其先齊人嬰之後也父閏以文學節行稱方遠幼辨慧學於廬州道士陳

元悟尋傳法籙於洞霄宮詮太平經為十三篇景福庚戌歲始居餘杭大滌洞彭城王厚加禮遇重建天柱宮傳居之王奏請賜紫衣勅賜號元同先生江東羅隱每就方遠授子書方遠必瞑目而授餘無他論門人見隱言謂方遠曰羅記室令公上客先生何不與之語方遠曰隱才高性下吾非授

書不欲及他事而隱亦盡師弟之禮降聖節前一日王使人以香花至方達授訖乃入齋中作控鶴

生怡然而逝  
異香滿室

**惠明**

續高僧傳姓王杭州人少出家後至蔣州巖禪師所一經十年誥請禪法在山經雪路塞七日

不食至荊州二虎爭鬪自往分解龍朔年從南山至京不久旋返云往曲江依閑修道莫知定所

**德秀**

高僧傳姓孫氏富陽人少棲梵宇留神律府嘗哀鬼神乏食恒以深更施其飲食浙汭之民傾

誠畏服及終於定山遷神入壚天降舍利七顆門人以瓶盛之藏於其壚或發之見秀齒上生舍利

紛紛而墜後人遂累甃成浮圖恒有白蛇蟠屈樵牧之童無敢近者

**道光**

高僧傳住杭州華嚴寺姓褚氏踰亂出家方冠受具學通毗尼為東南義虎持法華經創增廟

洎沒身不忘也上元二年終於本寺初光未沒其月三日質明支疾凝神依色身觀彌陀具相現在

其前至五日曼陀

羅華自天而雨

道欽

西湖高僧事略吳郡崑山人姓朱氏世服儒業年二十八貢於禮部道由丹徒遇鶴林元素禪

師得指入道之要遂出家大悟宗旨久之辭去素曰汝乘流而行遇徑即止師至臨安東北山下問途於樵者曰此徑山也師至東北而登涉重岡西至高峰北巖中據石林而坐俄有老人素衣拜於前曰我能也自師至此吾屬五百皆不安居當挈歸天目願以此地為立錫之所言訖不見北峰之陽有草菴可居蓋龍所造也大歷三年代宗詔至闕下禮遇有加一日在內廷帝起立帝曰師何以起師曰擅越何得向四威儀中見貧道帝悅賜號國一邇年辭歸杭州即其菴所建寺是為開山

始祖示寂後謚號大覺酉陽雜俎道欽住徑山有  
問道者率爾而對皆造宗極劉忠州晏嘗乞心偈  
令執爐而聽再三稱詣惡莫作衆善奉行晏曰此  
三尺童子皆知之欽曰三尺童子皆知之百歲老  
人行不得至今以為名理

### 道標

西湖高僧事畧富陽人姓秦氏年七歲有沙門  
過而識之勸令出家至德二年詔通佛經七百

紙者命為比丘邱師中選得度居南天竺寺嘗於靈  
鷲峰之南西嶺下葺茅為堂號西嶺草堂稱西嶺  
和尚高僧傳為靈隱白雲峰海和尚弟子經行之  
外尤練詩章當時吳興清晝會稽靈澈相與酬倡  
諺云雲之畫能清秀越之  
澈洞水雪杭之剡摩雲霄

### 守直

高僧傳字堅道錢塘人姓范氏詣蘓州支硎寺  
圓大師所受具足律儀是夜眼中光現長一丈

餘遲久方滅立願誦華嚴經於中宵夢神人施珠  
一夥及覺炯炯然如在握後移籍天竺住靈隱峯  
大歷五年三月寓龍興淨土院謂左右曰至人乘  
如而來乘如而去示其心然也而愚夫欲以長繩  
繫白日安可得乎遂告寂

道林

錦繡萬花谷杭州道林禪師號圓修見西湖秦  
望山有長松枝葉盤屈如蓋遂棲止其上人謂

之鳥窠和尚復有鵲巢其上自然馴狎名勝志元  
和中白居易守杭入山謁師問曰禪師住處危險  
答曰太守危險甚白曰守位鎮山河何險之有師  
曰薪火相交識性不停得非險乎西湖高僧事畧  
師富陽潘氏子幼出家詣長安西明學華嚴代宗  
詔國一禪師至闕師謁之得法南歸長慶四年入  
滅塔於北  
山喜鵲寺



續空

西湖志餘吳人本齊君房也唐元和初游錢塘至孤山寺飢臥芥中有胡僧顧君房曰法師旅

況詣否君房拭目而應曰汝何為者僧曰汝不憶講法華經於洛中同德寺乎探囊中出一朶如拳曰食之能憶過去未來君房食訖而寐頃之悟昨講經事遂落髮孤山寺中靈隱寺志續空一作鑑

空姓齊名佐

韶光

七修類藻莫詳族里唐穆宗時結茅杭州靈隱寺西峯巢构塢與烏窠布毛為友刺史白居易

重其道具撰飯之以詩邀師答云山僧野性好林泉每向巖阿枕石眠不解栽松陪玉勒惟能引水種金蓮白雲乍可來青嶂明月難教下碧天城市不堪飛錫去恐妨鶯轉翠樓前其高致如此卷以師得名

會通

景德傳燈錄杭州人姓吳氏本名元卿德宗時為六宮使見昭陽宮華卉敷榮翫久之倏聞空

中有聲曰空幻之相開謝不停能壞善根仁者安可省之因願從釋帝曰如果願往選日奏來尋得鄉信言母患亡歸省會齋晝夜精進誦大乘經而習與披荆其戒師常邇齊晝夜精進誦大乘經而習安般三昧尋固辭遊方為窠以布毛示之悟旨時謂布毛侍者今招賢寺乃師道場

靈祐

潯山禪師語錄福州長谿趙氏子年十五出家依本郡建善寺法常律師剃髮於杭州龍興寺

究大小宗乘教二十三遊江西叅百丈丈一見許之入室遂居叅學之首後住潯山天下禪學輻湊焉

國朝雍正十一年  
勅封靈覺大圓禪師

冢中

五燈會元蒲坂盧氏子於并州童子寺出家受心印於百丈海禪師結第於南嶽後住大慈示

衆云說得一丈不如行取一尺說得一尺不如行取一寸後屬武宗廢教師短褐隱居大中士申歲重剃染大揚宗旨西湖高僧事畧師居大慈山學者甚衆山素缺水師擬飛錫夜夢神人告曰勿他之我移南嶽小童子泉就師取用詰旦見二虎以爪跑地泉自湧出味甘如飴有僧自南嶽至曰小童子泉涸矣咸通三年無疾而逝壽八十

三傳宗

謚曰性空大師塔曰定慧之塔

齊安

舊浙江通志海門李氏子生時神光照室有異僧謂曰建無勝幢使佛日回照者非汝乎馬祖

見而深器之密示正法後謚悟空禪師指月錄住鹽官海昌院有講僧來叅師問座主蘊何事業對曰講華嚴經曰有幾種法界曰廣說則重重無盡畧說有四種師豎起拂子曰這箇是第幾種法界

主沉吟師曰思而知慮而解是  
鬼家活計日下孤燈果然失照

義存

舊浙江通志號雪峯南安曾氏子嗣法德山嘗  
結廬鹽官夜光旦天因號光明禪院今雪峯井

其手鑿也與巖頭至澧州鰲山阻雪自言初到鹽  
官見上堂問色空義得箇入處巖頭喝曰道從聞  
人不是家珍他後若欲播揚大教一一從自己胸  
中流出蓋天蓋地去存大悟曰今日始得鰲山成  
道

楚南

釋氏稽古畧福州張氏子得旨於黃蘗初抵姑  
蘇報恩寺指修禪定尋住錢塘慈雲光啟間刺

史錢鏐請師下山供養僖宗聞其道化就賜紫衣  
史德元年入寂塔於院之西隅著破邪論行世

全宰

高僧傳姓沈氏錢塘人投徑山法濟大師削染  
及修禪觀得石霜禪師印證入天台山闍巖二

十餘年惡鳥革音山精讓窟其出入  
經行鬼神執役後歸鎮國院終焉

## 五代

暨齊物

十國春秋一作濟物字子虛杭州人師王清  
觀朱君緒受法籙神符秘方後隨八大滌山

中依巖洞為室又構垂象樓貯道書幾千卷朝夕  
討論貫穿精微聽者莫不忘倦忘慙王欲為賜度  
弟子齊物對曰樂靜已久不願有也所居室壁東  
西各置一隙采日月光華久之忽語左右曰吾將  
復往羅浮石樓間  
矣遂不知所之

道翊

西湖高僧事畧不知何許人石晉天福四年卓  
庵天竺山西北草衣木食高行絕塵一夕見前

奉有光燭天跡視得異木人莫能名師乃取之命  
匠者孔仁謙刻為觀音大士像夜夢白衣人曰雕

像已就明日有僧自洛陽來腰間有古佛舍利當求之已而僧果至如夢求之得舍利三顆納於大士頂門自是靈異大著宋治平二年郡守蔡襄表其事上之賜靈感觀音院額

可周

高僧傳俗姓傅晉陵人出家建元寺友生勉之曰非其地樹之不生今豫章經謂之江論謂之

海胡不往請業乎周遂挈囊達波遇雲表法師盛集窮法華慈恩大疏日就月將幹運深趣梁乾化二年受杭州龍興寺召開演黑白衆恒有半千武肅王錢氏命於天寶堂夜為冥司講經鬼神現形扈衛往往人覩焉王聞而重之資金如意并鉢紫衣一副加號猜志通明以天成年終於觀音院

本房

道潛

西湖高僧事畧河中武氏初謁清涼法眼一見異之許入室問答言下開悟法眼曰子向後有

錢忠懿王命入府受菩薩戒署慈化定慧之號周  
顯德元年建慧日永明寺請師居之為開山始祖  
衆常五百果符法眼之語永明至宋改名淨慈

### 志逢

五燈會元餘杭人幼歲出家臨安之東山朗瞻  
院嘗夢陞須彌山觀三佛列坐初釋迦次彌勒  
皆禮其足惟不釋第三尊釋尊謂之曰此是補彌  
勒處獅子月佛師方作禮覺後因閱大藏經乃符  
所夢天福中抵天台雲居參韶國師賓主緣契頓  
發元秘一日入普賢殿晏坐有神人跪膝於前曰  
凡折鉢水亦施主物傾棄非所宜也言訖而隱自  
此洗鉢水盡飲之吳越國王召賜紫署普覺禪師  
住功臣山西湖高僧事畧忠懿王建普門精舍請  
揚宗要為開山始祖後五雲山新創華嚴道場施  
以終老出入常攜大扇乞錢買  
飼飼虎虎每迎之載以還山

行修

十國春秋號法真泉州人本陳氏子生而長耳垂肩七歲猶不言或曰痘耶忽應聲曰不遇作

家徒撞破烟樓耳長至金陵元棺寺祝髮受具叅雪峯義存至四明山中獨棲松下說法天花紛雨又跌坐龍尾巖百鳥叩花飛繞來杭之法相院依石為室禪定其中乏水卓錫巖際清泉迸出純祐初志懿王以誕辰飯僧永明寺僧延壽告王曰長耳和尚定光佛應身也王趣駕叅禮行修默然但云永明饒舌俄頃跏趺而化久之肌膚津澤爪髮復長月必三淨寺僧恐其久而毀乃髹塗其骸體崇寧三年賜號崇慧大師

宗季

高僧傳俗姓愈臨安人出家欣平寺後往衢州迺杭龍興寺召講時僧正蘊讓給慧縱橫兩面

之敵也與閻邱方遠羅隱為莫逆之交兄而中問季作二百語酬之讓正嘆賞遂請開講四十餘年出弟子七八百人漢乾祐戊申歲疾終於本房初季眇二目曾夜行感神光引之嘗覽古師之述作



曰可俯而窺也遂撰諸經疏鈔  
別行義章數十卷並行於世

延壽

惠洪智覺禪師行業記餘杭王氏子兒時知敬  
佛乘及冠日惟一食誦法華經五行俱下有羣

羊跪聽年二十八為華亭鎮將見漁船萬尾戢戢  
皆易之放於江投翠巖岑公學出世法吳越文穆  
王聞而慕悅聽其雜髮嘗習定天台天柱峯下有  
尺鷄巢衣衲中初說法雪竇建隆元年移靈隱又  
移之永明衆至二千時號慈氏下生十國春秋延  
壽以心為宗以悟為旨著宗鏡錄一百卷又注心  
賦抱一子若干卷賜號智覺大師西湖高僧事畧  
師字冲元得法於天台韶國師初住雪竇尋歸西  
湖忠懿王請為永明第二代居十五年移天台夜  
施食朝放生六時散花行道日課一百八事未嘗  
暫廢別號  
抱一子

國朝雍正十年奉  
勅加封妙圓正修智覺禪師

宋

張契真

神仙通鑑字齊一錢塘人幼孤依上清宮胡法師浮遊江浙上會稽探禹穴歷縉雲遊赤

城以訪仙道時朱天師居天台目而器之以其有  
青骨方瞳因度為道士久之還錢塘居吳山真聖  
宮周顯德五年受正一明威靈寶法籙於大元樊  
先生錄是紫雲玉笈之書無不歷覽名振江浙宋  
太平興國中召見欽對稱旨賜紫衣以道書魚魯  
未定詔兩街道錄選優學者刊正既畢賜玄靜大  
師之號

管歸真

咸淳臨安志錢塘人雍熙初有青衣過之間  
所從來則曰西人也姓邊氏有點化黃金之

術願以為贈歸真曰庶歲綿遠能無變否曰五百  
年後當復故耳歸真笑曰得不為悞後人耶青衣  
以手加額曰先生真人也吾有紫府符法今得其  
人尚可隱乎於是跪而受之不踰年符法大振祥  
符初詔赴闕行符水法凡病在膏肓者悉為平治  
後以京師大旱召作法雲龍飛躍膏雨大霑天聖  
初賜正白先生號四年十月呼其徒告之曰繡衣  
使者告我功業上達帝宸今將往任職矣遂偃然  
而化熙寧中趙抃  
守杭記其行事

### 沈若濟

神仙通鑑臨安人結菴茅山以施藥為務宣  
和間召對封洞元先生嘗指華陽洞之東隙

地曰必葬我於是紹興十五年解化其徒奉治命  
掘地六尺許得石板大書六字曰沈公瘞劍於此

觀者  
異焉

唐子霞

洞霄宮志未詳其字宋政和間入道洞霄宮著書名大滌洞天真境錄嘉靖浙江通志子

霞自號渾淪道人宣和元年詔主洞霄宮明年盜起臨安官吏散走其徒治舟請行曰吾被天子命主此宮守死職也公等第去已而賊至正色叱之遂遇害門人程用光叩闕言狀憫其忠賻錢三十萬贈正素大師

王元悟

通元觀志自北海來至臨安見吳山有五色雲遂登絕頂趺坐竟日士民乃編茅為庵設

三道像供以香花坐一木榻日進一蔬食足不下山者三十年一日召眾曰予辭世矣乃作偈畢蛻去是為寧壽開山祖也

蔡道像

通元觀志不知何許人宋高宗渡江遇風舟不能進問左右曰此去何神對曰三茅山有

茅君焉待之立應後幸臨安之吳山有三茅真君像因感  
項之不見訪其地惟茅庵中有三茅真君像因感  
江中之事遂賜為三茅宇壽觀選高行者充和觀  
事以道像主焉兩浙名賢外錄每建金籙齋輒有  
仙鶴百餘盤旋醮壇之  
上因賜七寶以鎮其山

李爰

神仙通鑑字定國寓臨安軍營中以聚學自給  
暇則縱遊湖山嘗詣淨慈寺過長橋於竹逕迷

路見青衣道人劇筍爰揖之道人問所往曰將往  
淨慈瞻禮五百羅漢道人曰未須去且來同食燒  
筍食之甚美俄風雨晦冥失道人所在少頃雨止  
而出至寺門覺身輕神逸行步如飛歸舍不復飲  
食其從兄大猷為諸王宮教授將之任遣僕致書  
見其願如桃花且能辟穀以語大猷及大猷至則  
已去遊茅山矣後又聞入蜀隱青城山大猷為梓  
路提刑使人至眉訪所在眉守復書云數年前已

輕舉乘雲而去

白玉蟾

紫桃軒又綴本姓葛名長庚閩清人父亡隨母改適雷之白氏因改姓名神仙通鑑玉蟾

號海瓊子得翠虛陳泥丸先生之道喜飲酒不及醉博洽儒書究覓禪理大字草書視之若龍蛇飛動兼善篆隸尤妙梅竹受上清籙行諸階法所用雷印常佩肘間祈讓輒有異應嘗游西湖至暮墮水舟人驚尋不見達旦則在水上猶醺然也續文獻通考嘉定中命館太乙宮一日不知所在封紫清明道人真人

唐道錄

宋度宗勅住持宗陽宮詔爾唐道錄品行清真法術精妙特崇道級闡厥元風佑國福民

無負職掌爾其欽哉萬歷錢塘縣志道錄素以精虔章黜附名

沈敬

謂之仙傳浙右人自幼學道後遊鍾山遇一老姥

一白石款之曰但以山泉煮此石待軟如藥劑即食之若未軟不得停火言訖不見敬因於山中結

茅汲泉煮石不停火凡十載石不軟敬乃不煮忽一夜老姥復來謂曰此非常石是瓊樹之實也若

虔誠煮之即復軟軟而食即得道矣敬遂齋戒煮至明日其石忽軟香馥滿山敬盡食之頓覺童顏

髭髮如漆心清體輕後數日不知所之兩浙名賢外錄敬錢塘人

延治

佛祖通載汝州風穴禪師諱延治餘杭劉氏從開元寺智恭剃髮受具修止觀定慧宿師爭下

之遊名山謁鏡清機語不契見南院俯就弟子之列從容承稟日聞智証後唐長興二年至汝水見

草屋數椽田父曰古風穴寺乃留止日乞村落夜然松脂單丁者七年州牧聞其風禮致之上元日

開法嗣南院有宋太師者施第為寶坊號新寺迎  
居馬法席冠天下周廣順元年賜寺名廣惠宋開

寶六年八月旦登座說  
偈至十五日跏趺而逝

**紹巖**

高僧傳俗姓劉雍州人七歲出家於高安禪師  
十八進具於懷暉律師凡百經書覽同溫習泊

入吳會棲息天台四明山與德韶禪師共次疑滯  
於臨川益公遂詣於錢塘湖水心寺住錫恒諷持  
法華經無晝夜俄感陸地生蓮舉城人瞻矚巖亟  
命舉而蹂之續居上方淨院有疾不求藥石作偈  
累篇示門徒曰吾誦經二萬部次以  
安養為期跏趺坐亡茶毗於龍井山

**晤恩**

武林梵志字修已常熟人姓路年十三聞誦彌  
陀經遂求出家乃投破山興福寺受訓後晉開

運中造錢塘慈光寺志因師講貫彌年通達法華  
光明經止觀論雍熙三年八月朔日於中夜覩白



光自井而出明滅不恒乃絕粒禁言一心念佛至二十五日為弟子說止觀旨歸及觀心儀辰時端坐而化

慶祥

五燈會元九曲禪師餘杭人辨才冠衆多聞強記天台門下推為傑出成化杭州府志姓祝氏

受業於祥符寺學南山律兼通六籍史書莊老百氏之學撰高僧傳三十卷淳化二年預史館集新書五年遷左街僧錄

智圓

佛祖通載字無外自號潛夫生錢塘徐氏八歲受具二十一歲聞奉先源清師傳天台三觀之

旨問辨凡二年而清沒遂居西湖孤山西湖高僧事畧師早勤儒學兼涉老莊自號中庸子居孤山瑪瑙院有高世之節時王文穆罷相來牧郡僧悉迎於闌外慈雲遣使邀師偕往師以疾辭曰為我

致意慈雲錢塘且駐却一僧聞者嘆服杜門獨居  
與林逋為隣友以詩文自娛雜著五十一卷題曰  
閒居編乾興元年二月十七日自作祭文挽詞越  
二日示寂門人奉遺教斲院之後山斂以陶器合  
而瘞之後十五年積雨山頽啟陶視之真身不壞  
爪髮俱長其唇微開齒若珂雪謚號法慧治平二  
年改院為寶勝紹興二年創延  
祥觀有司移額山北併塔遷焉

師範

釋氏稽古畧無準師師範生蜀郡梓潼雍氏  
謁破菴先禪師於平江西華秀峯頓悟元旨住

明州清涼遵雪竇詔住育王遷徑山召入對修政  
殿賜金襴僧衣宣詣慈明殿陞高座說法帝垂簾  
而聽賜號  
佛鑑禪師

道誠

武林紀事錢塘慧悟大師道誠居月輪山撰釋  
氏要覽三卷又注王勃釋迦成道記丞相王隨

守杭有  
詩贈之

契嵩

僧寶傳藤州鐔津李氏受記蒨於洞山聰公夜  
則頂戴觀音像誦其號必滿十萬乃寢經書章

句不學而能作源教論十餘萬言明儒釋一貫未  
幾遊衡嶽歸著禪宗定祖圖傳法正宗記書成游  
京師仁宗覽之嘉歎付傳法院編次入藏賜號明  
教韓琦歐陽修延見尊禮之東還居錢塘佛日禪  
院應密學蔡公襄所請也夢梁錄契嵩字仲靈自  
號潛子熙寧歲季夏入滅以釋氏法茶毘六根不  
壞者三曰眼曰舌曰童真頂骨數珠  
五物存焉名其塔曰五根不壞之塔

慧辯

西湖高僧事畧字訥翁華亭富氏子受業普照  
從天台韶及浮石矩傳天台教觀韶將老命師

代講臺章安以金篦擊其口曰汝勤於誨人當得  
辨智久之卒繼其席嘉祐中翰林沈公遘帥郡以

嚴為理察師道行獨異之得涖僧職遷都僧正東坡時為通守嘗與師為方外之游講授二十五年往來常千人無何歸隱草堂但六事隨身而已熙寧六年冬旦起盥濯別衆而化遺戒須待東坡至方可合棺四日坡始抵山中見其趺坐如生頃刻溫暖作三絕哭之師沒二十一年東坡追序其事云余去抗夢至西湖上有大殿榜曰彌勒下生故人海月辨師之流皆行道其間乃作贊辭類濱銘塔其

了元

僧寶傳字覺老饒州浮梁林氏為開先道者嗣四住雲居曹王以其名奏之神宗賜號佛印

錢氏私誌東坡在惠州佛印居江浙致書云子瞻負高才遠放寂寞之濱權臣忌子瞻為相耳人生如白駒過隙三二十年功名富貴轉盼成空何不  
一筆勾斷尋取本來面目西湖游覽志餘抗之蠟

燭菴聖水寺  
皆其道場也

元淨

武林梵志字無象於潛徐氏生而左肩肉起如袈裟緣八十一日乃滅父嘆曰是宿世沙門也

幼出家受業於慈雲慈雲沒復事明智年二十五賜紫衣及辨才號太守沈邁謂上天竺觀音道場以音聲懺悔為佛事非禪邪居請師以教易之師至鑿山增室萬礎學者數倍居十七年有奪之者適年奪者敗復以畀師趙抃贊之云師去天竺空山旣災天竺師歸道場光輝越二年謝去老於南山龍片之上精修行業行成力具著應非一嘗與僧熙仲同食仲視師眉間有光如螢覽之得舍利元祐八年示寂壽八十一果符初生肩痕之徵塔成東坡誌其事

法照

夢梁錄不妄交遊與和靖先生同時僧志圓為友崇寧歲賜號元照大師

惠勤

續文獻通考餘杭人嘗從歐陽修遊三十餘年修稱其為人聰明才智有學問尤長於詩蘇軾

有送錢塘勤上人詩序

遵式

西湖高僧事畧字知白台州寧海葉氏母夢燃明珠而生出家於東掖山傳天台教於寶雲通

未幾繼其席祥符八年刺史薛公請居靈山天竺寺寺久廢師按其舊而新之王文穆出守重師之

道奏復天竺名尋請賜慈雲號依經撰集諸懺法盛行於世常行三昧以九十日為期感應非一凡

為法祈禱必然指唯存三焉及建光明懺堂每架一椽一龕必誦大悲咒七遍屢經兵火歸然獨存

願力致也天聖九年歸東嶺草堂明年示寂累謚法寶禪慧淳祐八年其徒明理禱晴獲應加謚聖

應淳祐十一年復應加謚正覺兩浙名賢外錄時北宗多輕台教乃伏闕上書請以止觀入藏因章

獻太后命修懺若金光明護國懺儀行懺多異人稱慈雲懺主

道潛

雲莊漫錄參寥本名曇潛子瞻改曰道潛廣興記於潛人通內外典有詩名蘇軾在黃州時夢

參寥子賦詩有寒食清明都過了石泉槐火一時新之句後守錢塘而參寥子居智果院軾於寒食後訪參寥汲泉鑷火烹黃蘗茶忽悟所夢詩作應夢記

守璋

夢梁錄姓王戒行精潔尤工於詩號文慧禪師有柿園集行於世高廟於紹興二年幸圓覺寺

因觀其集宸翰親灑晚春一絕刻石於亭曰山深烟景重林茂夕陽微不雨花猶落無風絮自飛

宗杲

普燈錄字國美氏嗣法佛果園悟勤禪師紹興七年詔住徑山孝宗即位賜號大慧禪師張浚

普覺禪師塔銘詔宗杲示寂於徑山明月堂詔以明月堂為妙喜庵賜諡普覺塔曰寶光

德朋

夢梁錄姓顧字澹堂入徑山講論禪教四年因觀竹溜以杵通節有聲豁然開悟遂號為竹筒

和尚紹興年嘗選入慈寧殿陞座講般若經法高廟奇之賜號及法衣

慧才

釋氏稽古畧居杭州南山解行入四明法智尊者之室每持大悲咒必八百遍嘗夢觀世音脫

袈裟以衣之是春三月為靈芝元照及道俗千人授菩薩大戒於雷峯方羯磨觀音像放光明初貫寶饌漸散講堂燈炬日光皆為映奪

淨慈禪師守一作證戒光記米芾書

淨源

西湖高僧市畧字伯長姓楊氏生而敏慧依東京報慈寺渡達大師得度奮志參尋初見華嚴

承遷次見橫海明禪後見長水子璿盡得華嚴奧旨住泉之清涼蘇之觀音杭之祥符湖之寶閣秀之善住左丞蒲公守杭以慧因院易禪為教命師居之所至緇素景慕師合華嚴證聖正元二疏為



一以便觀覽製華嚴楞嚴圓覺三藏法及法華集  
義通要十四卷又疏解仁王般若等經元祐三年  
冬示寂茶毘得舍利無數瘞於慧因院之西北壽  
七十八先世泉之晉水人故學者以晉水稱之

### 思淨

其西湖高僧事畧錢塘喻氏子好畫阿彌陀佛臻  
妙世呼喻彌陀棄家學佛就北關僦舍飯僧

不二十年及三百萬賜妙行額廣所居為寺至今  
接待不絕屬離亂師造賊壘願以一身代一城之  
命賊聞之悚然為之少戢或問師畫彌陀何不叅  
禪答曰平生只解念彌陀不解叅禪可奈何但得  
五湖風月在太平何用起干戈兒時遊西湖多寶  
山輒作念曰異時當鐫此石為佛後果為彌勒像  
侍郎薛公問曰彌勒現在天宮說法鑿石奚為答  
曰咄哉頑石頭全憑巧匠修只今彌勒佛莫待下  
生求平生務實際不事虛飾紹興七年  
年跌坐而化侍郎張九成銘其塔

惟政

西湖高僧事畧字渙然華亭黃氏居功臣山出

性簡率冬不附爐惟以荻花作毬納足其中客至共之特好玩月盤膝坐大盆浮池中自旋轉之吟

嘯達旦率以為常世稱為政黃牛

惟尚

寧誌備攷鹽官人出家善慶寺徧參古德住壽聖禪院本雪峯結菴故地師住八年為創殿宇

遂成叢林已又住薦福因病復還未幾示寂張九成為作記

淨元

春渚紀聞錢塘楊村法輪寺僧政和癸巳海岸崩毀至紹興癸丑師忽謂衆曰我釋迦文佛歷

劫以來救護有情捐棄命軀初無稍靳即振履經行至蜀山海風激濤噴涌山立將褰衣而前衆爭挽引舉手謝衆踴身沉海謂葬魚腹矣移時風止海波如鏡師端坐海面如有物供戴者順流而來

直抵崩岸視師衣服不濡也岸側有數大魚昂首久之沿波而去自此海毀不忠蜀山民營庵居之至紹興乙卯四月八日忽集衆說偈安坐而化

寶印

續禪燈錄嘉州李氏子幼通六經依密印於中峯一日印舉僧問巖頭起滅不停時如何巖叱

曰是誰起滅師啟悟即首肯後至徑山謁大慧慧掃室延之連主數刹住雪竇徑山開堂說座孝宗召對選德殿稱旨賜肩輿於東華門內紹熙元年十一月往見智策與之言別策問行日曰水到渠成歸索紙書十二月初七夜鷄鳴時九字如期而化

道冲

釋氏稽古畧武信長江苟氏紹熙三年出岷叅松源岳潭師於饒州薦福會松源舉首座曹溪

生和尚出世妙果聽其入門法語有省遍歷叢林皆分半座嘉定十二年由徑山首座出世嘉興天

寧淳祐四年奉旨住靈隱八年詔住育王使者三返不起明年二月開山吳之法華八月詔住臨安

府徑

山

宗印

續文獻通考字元實鹽官陳氏子寧宗嘗召對便殿錫號惠行法師以營觀室行化吳中至松

江謂其徒曰吾緣畢此乃袒右脇而化

慧遠

晉燈錄佛海禪師名慧遠生眉山彭氏年十三從藥師院宗辨為僧會團悟復領昭覺遠依之

因悟普說舉龐居士問馬祖不與萬法為侶者是甚麼人馬祖曰待汝一口吸盡西江水即向汝道

聞之大悟東下由虎邱奉詔住阜亭山崇先屢遷名利稟法嗣佛米園悟勸禪師

道濟

淨慈寺志字湖隱天台李茂春子母王氏夢吞日光而生年十八就靈隱昭堂遠落髮風狂嗜

酒肉寺東計之晤云佛門廣大宣不容一顛僧自  
是人稱濟顛遠寂往依淨慈德輝為記室嘗欲重  
新藏殿夢感皇太后臨賜帑金嘉泰四年火燬  
寺濟乃自為募疏行化嚴陵以袈裟籠罩諸山  
木自拔浮江而出報寺衆云木在香積井中六丈  
夫勾之而出監寺欲酬之錢辭曰我六甲神豈受  
汝酬乎遂御風去瀕湖居民食螺已斷尾矣濟  
乞放水中立而無尾嘉靖二年逝葬虎跑塔中

### 慧開

西天目志與石霜同參作補衲看經二偈自黃  
龍山挾龍來無門洞龍每蜿蜒松上禱雨輒應

孟洪吳潛聞於朝召對所致雨者曰寂然  
不動感而遂通賜金紋伽黎後身為明本

### 明贍

杭州府志於潛徐氏子幼定慧喜趺坐出家西  
菩提寺後入龍唐憩小石龕內度宗后患乳癰

詔師治之以玉盂盛水楊枝灑之立瘥封七祖大  
師帝問師何所願曰但乞得龍唐一袈裟地以安

禪師詔許之於山前解袈裟向空搖擲覆蓋四十  
五里隨豎幡焉咸淳八年錢塘江婆龍為祟度宗  
仰天祈禱忽見師從空  
而下舉鉢藏龍而去

元敬

莫子大西湖高僧事畧序瑪瑙講師元敬字節庵會萃名宿嘗駐錫錢塘者得二十有四人撫其事實而繫之贊續又得六人述而贊之圖其形置之閣合而成書名西湖高僧事畧燈燈相傳續佛慧命將使後人而復高後人也

元

周允和

錢塘志補字謙甫號清溪仁和人初生有雷殷殷發地下十八歲入大滌學道師冲妙先生宋咸淳初宣醮内庭賜號妙有大師七年開山冲天觀與稽雪巖郭似山為方外友元至元戊寅

受崇道清真大師洞霄主席壬午三月兼領太乙宮乙酉七日夢遊大滌洞天見數仙人吟咏二十  
五日召衆云昨暮見星大如月西  
隆今往矣端坐而化神色不變

金正韶

成化杭州府志字九成號約山餘杭人早歲師桂林舒公於石室洞讀書十餘年度宗召

為龍朔宮書記至元間詔入杭主洞晨觀講究性理之學將解化留書別同袍而去

阮日益

洞霄宮志號鶴巖於潛人受度於天目元雷山真慶觀鶴形古貌苦志食淡遍遊湖海通

性命之學展卷超悟兀坐於天目石巖中寒暑不  
動星渚趙侍郎尤所敬愛為築庵靜坐四十年復  
還故山不出至元間  
尸解去壽八十餘

葉林

鄧牧

研北雜志林字去大錢塘人牧字牧心俱隱大滌山或數日不食或一食兼人

清夜放遊則不避豺虎白晝危坐則客至不起所  
為文章多世外語鄧則全效柳子厚大德某年冬  
葉忽馳書別親友云將他往且詣鄧言別至明年  
正月八日端坐而逝後十餘日鄧知葉已仙去數  
曰葉君出處與我同奈何給我言別吾亦當長往  
耳乃述葉墓志又於燈下取其文集讀畢而終續  
文獻通考牧錢塘人居餘杭洞霄宮之超然館所著洞霄志行世

王壽衍

韜耕錄字眉叟杭州人出家為道士受知晉  
邸後以弘文輔導粹德真人管領開元宮

張天雨

堯山堂外紀字伯雨錢塘黃冠號真居九成  
之裔初見虞伯生伯生問能作幾家符篆曰

不能伯生曰某試書之以質是否連書七十二家  
伯雨輒下拜曰真吾師也自是托交甚契與伯生  
書必稱弟子成化杭州府志伯雨蚤棄妻子從開  
元宮真人王壽衍為道士風裁凝峻工書善詩歌



文益奇古與吳興趙孟頫浦城楊載蜀郡虞集豫章揭傒斯清江范梈金華黃潛交甚善嘗修茅山

志因號句曲外史

徐弘道

紫陽道院志號洞陽修真瑞石山年八十三沐浴更衣書頌而蛻有不離本性即神仙之

句得法弟子丁野鶴也弘道常感張平叔住山傳訣故庵名紫陽云

丁野鶴

武林紀事錢塘人棄家為全真於吳山之紫陽庵一日召其妻王守素入山付書四句云

懶散六十三妙用無人識順逆兩相忘虛空鎮常寂坐抱一膝而逝方外謂之騎鶴化守素束髮簪冠着道士服奉夫遺骸二十年迹不下山薩天錫有詩曰不見遼東丁令威舊遊城郭昔人非鏡中人去青鸞老華表山空白鶴歸石竹淚乾斑點在玉簫聲斷彩雲飛洞門花落無行迹獨坐蒼苔補

道衣

劉大彬

兩浙名賢外錄錢塘人隱居茅山延祐間得九老仙都玉印仁宗即以賜之加號洞觀微

妙元虛真人作茅山志三卷張伯兩為之書尋蛻骨於華陽洞中

原妙

淨慈寺志號高峯吳江人出家淨慈叅斷橋倫倫授以生從何來死從何去話窮究未契立死

限三年脇不至席口體俱忘時雪巖欽寓南屏北磻塔所懷香往叩之方問訊即打出如是者三一

日忽覩五祖演像讚云百年三萬六千朝返覆元來是這漢驀然破疑遂辭入天目立死關於師子

巖三十餘載影不出山所著有高峯語錄

明本

稽古續集號中峯錢塘孫族童時嬉戲必為佛事稍長聞經教燃指臂求佛甚切晝夜彌勵因

則以首觸柱期必得乃已誦金剛經至荷擔如來處恍然開悟後觀流水乃大發明自是說法無碍

續文獻通考仁宗賜號廣慧禪師及歿賜諡智覺元統中詔以其廣錄刻梓命揭溪斯為序

希陵

徑山志字西白依東叟賴於淨慈掌內記後至徑山分座說法元世祖召見賜號佛鑒成宗加

號大圓仁宗又加號慧照至正壬戌四月手書付囑說偈而逝謚大辨塔曰寶華有瀑巖集及語錄

世行

溫日觀

輟耕錄瑪瑙寺僧能書所畫葡萄鬚梗枝葉皆草書法也性嗜酒然楊總統飲以酒則不

一沾唇見輒罵曰抵墳賊

水盛

稽古續集字三源自號無住翁樂平人姓范依羅山常公受度謁月庭忠公見孤舟濟師自信

法次可證因發誓云吾此身不能作佛當入無間  
獄也由是力叅發悟濟公記之天歷間聘主西湖  
妙果寺一時公卿與為方  
外交年七十三書偈而逝

大訐

堯山堂外紀住杭州中天竺有學行研窮教典  
旁貫百家文宗召赴闕特賜三品文階舊著黑

衣文宗賜以黃衣  
其徒後皆衣黃

明

貝國器

名山藏海寧人有異術弟子欲學之不傳也  
佚其速出開筭竊其書見國器在筭中吳元

年與鐵冠道人遊白下同宿值高皇帝微行假榻  
馬無枕枕斗國器夜起視天曰帝星臨斗帝昂首  
聽之鐵冠曰尚離尺餘帝大驚明日召二人至問  
以國號年號所對皆帝心默定者益異之後忽不

見

周恩得

列朝詩集傳字養真錢塘人行靈官法先知禍福文皇帝北征召扈從數試之不爽招弭

後除祈雨禳兵咸如影響乃命祀靈官神於宮城西靈官藤像獲之於東海朝夕崇禮所征必載及金河川昇不可動就思得問之曰上帝有界止此也已而果有榆川之後思得歷事五朝年踰九十賜諡弘道真人

徐道彰

通元觀志法名道明錢塘人禮徐玉巖於寧壽觀後住持通元觀號凝虛養素通元冲妙

弘道法師壽七十四臨終有羣鶴翔空之異

唐秩

萬歷錢塘縣志得大梵斗姥五雷法禱雨祐聖觀運旗摩空雲轉如輪雨隨如注偶被疾見幢

欽定四庫全書



卷一百九十八

蓋往來遂化去已歸其蛻三年矣忽市囂中從稽  
幼文索所借書幼文語其弟子李一正大駭異

懷渭

獻徵錄字清遠晚號竹庵南昌魏氏子生而英  
發誦書攻文不待師授而知解日聖時全悟以

大中大夫住持集慶大龍翔寺聞之喜曰此吾宗  
千里駒也亟挽致座下一日全悟警厲諸徒衆未  
有對清遠直前肆言全悟叱之氣不少沮如是詰  
難至於再三全悟笑曰汝可入吾室矣浙江行省  
康里公延主會稽之寶相未幾遷杭之報國轉湖  
之道場洪武初奉詔設無遮大會於鍾山退居錢  
塘之梁渚

愚海

杭州府志名善智姓葉氏海寧人崇先講師辟  
為侍者令讀華嚴頓明教觀住持崇惠有修蛇

現於庭師囑曰果是天龍呈象宜現大身須臾果  
現大身騰空而去洪武中詔入京師講華嚴勅住

安國寺入寂茶  
毘面古不壞

守仁

靈隱寺志號一初富春人靈隱僧從楊廉夫張伯雨遊能詩善書法洪武中徵授僧錄司右善

世一初有志事業不偶為僧嘗言我輩從事文墨非以廢道蓋有不得已也所著有夢觀集

立中

武林梵志錢塘孫氏子年十三出家慈光寺謁淨慈祖芳聯公師深器之造北郭普明禪寺退

席重整本山正統辛酉六月上堂說偈曰今年八十一老病隨緣且遣日今年記着後年事後年記着今朝日至癸亥焚沐坐化月日無爽

株宏

列朝詩集傳字佛慧號蓮池仁和沈氏年十七為諸生三十二歲辭家祝髮徧參諸方見雲棲

山水幽寂遂有終焉之志結茅三楹絕糧七日倚壁危坐而已環山多虎患師發悲懇諷經施食虎

遂遠徙歲大旱學木魚循田念佛雨隨足跡而注  
居民德之遂成蘭若首倡毘尼以立基本單提念  
佛以攝禪淨住山三十餘年乙卯七月別衆示寂  
臨行張目云老實念佛勿捏怪勿壞我規矩向西  
念佛而逝塔於五雲山麓舊浙江通志師初出家  
語繼室湯曰生死事大汝其勉之時湯年十九灑  
然省悟亦出家孝  
義庵法名徠錦

國朝雍正十二年  
初封淨妙真修禪師

真可

列朝詩集傳字達觀吳江沈氏五歲不語有異  
僧過其門摩頂謂曰此兒出家當為人天師言

訖不見遂能言年十七宿虎邱僧舍聞僧夜誦八  
十八佛名心大悅侵晨卽剃髮遊五臺至京師參  
徧融笑巖諸老發明大事歸吳復楞嚴廢寺於嘉  
禾剏剏藏緣於徑山精嚴戒律化後十二年葬於



徑山茶毗之日內  
身儼然舍利無算

真中

杭州府志海寧孫氏子年十七投安國寺受具  
自以根鈍不能憶持伽陀六時度禮大士以祈

淨慧一夕仆地若人以凉水灑面遂有省與藏主  
涵春繙閱經律往復圓辨叅東禪深研止觀後歸  
安國禁足立死限既老遶法器得受汰曰吾受涵  
師囑累今付得人吾願已畢抵雲岫數日端坐唱  
化佛而

道盛

虎跑寺志字覺浪別號杖人蒲城張氏子東苑  
鏡禪師法嗣生道場五十三處杭州府志道盛

禪律精嚴儒釋淹貫嘗示衆云有血性漢被世界  
磨滅示寂後塔於棲霞山有學庸宗旨莊子提正  
儒宗三寶及  
語錄百餘卷

今釋

仁和縣志金堡字道隱仁和人崇禎庚辰進士授臨清知州因罹科不及額坐解職後難髮為

僧名曰今  
釋號澹歸

國朝

赤脚仙

舊浙江通志不知何許人常默不食一食則兼十人猶未饜冬大雪呼居停主掃雪聚成

小廬居其中須臾氣拂拂騰上  
聚雪皆化與之言多中人隱

孫道元

杭州府志字善長別號復陽子桐川人父嘗遇羽客修髯長身謁曰君當舉子是垣中一

星言已即去初生時不啼不乳者累月嗣若聞空中有語者遂受乳甫七齡求出家父母知其有風根送吳山火德廟度為道士二十四訪遊五岳盡得要妙過信州張真人授以正一清微五雷大法

示曰大道必積功行藉以福國利民若獨善其身  
德不被物雖得長生猶鴟子也由是以救濟累功  
以參鍊彌性習靜大滌山年七十有四尅期示化  
初滌山有隙壤虎踞其上人莫能穴至是為師營  
厝虎長嘯躍  
去後不復見

和有鴻

錢塘縣志字公鑑少學法華陽衍教天壇後  
為宗陽宮都紀禱雨祈晴有求輒應尤能驅

邪辟疫年七  
十三無疾逝

圓融

杭州府志西蜀人年十六出家得戒天童密和  
尚隨侍天台叅報思遊大雄次至金剛菴壬寅

七月忽語衆曰吾初六歸去至日從容禮佛辭衆  
入龕昇至塘南村院融坐龕中自開兩門取香三  
枝說偈仍自掩龕俟時  
祥烟西颺凝然而化

弘禮

杭州府志號具德會稽張氏子歷住廣孝佛日天寧靈隱徑山

國朝

順治初靈隱寺燬於火弘禮卓錫二十年鼎新重建

方宜

舊浙江通志字夢曙苦人出家法相寺左筆善書有詩名年十九有悟盡棄章句續雲棲放生

之會不替者三十年開叢席於上鄉之淳橋康熙元年仲冬二十五日徧禮佛像集徒講演金剛經一卷次日至大江之濱卓杖大聲曰好江水遂卓立而化

德修

杭州府志錢塘人薙髮後習靜北山窮谷中與猛獸雜處面壁二十年不知其叅尋何自後住

茶亭康熙七年元宵日忽出衣單分給人云當別云及早自炊水沐浴召鄰人為封龕說偈曰無拘無束不與形役逍遙自在正月十六衆竊笑之見其攜火入龕趺坐龕纔合火自內出風熾焰疾頃

化刻而

成法

徐自洙伯亭大師增銘初名續法伯亭其字仁

六難染十七圓戒二十叅乳源德水法師聽講楞嚴宿慧駿發洞澈微旨嘗論天台賢首之異同乳

峯曉以雲棲之說言下大悟遂受囑精研四分律開講於慈雲兩修大殿重建聖果仁壽諸梵宇康

熙二十八年主上天竺四十六年

聖祖

仁皇帝南巡幸寺

賜資優渥

重修毘盧殿閱十載還歸仁壽雍正六

年四月朔說偈辭衆而逝世壽八十八

大涵

陳元龍雁公塢志吳江人俗姓潘九歲出家既長入靈巖從師繼起遊南嶽有名楚僧忌之謀

折其足乃夜遁走大雪中飢則搏雪食之自號喫雪子後住雁宕山又入黃山遂字雁黃在黃山聞

熊伐木聲有悟盜擊之不死後居海寧安國寺元  
龍撫粵西招之遊羅浮歸至肇慶弔湖山示微疾  
說偈而逝塋在桂林棲霞寺傍著有黃山草西湖  
草補陀南叅集彈指集桂羅壯遊集鹽官剎草皆  
已刻詩  
多警句

浙江通志卷一百九十八